


眞繫

ル 5
3254
20



門 凡 5
章 3254
卷 20

滇繫書目

趙州師 鮑荔屏纂輯

藝文第四冊

范承勳 雲貴總督奉天人

土夷歸誠懇請授職疏

石琳 巡撫奉天人

進呈編輯全書疏

王繼文 巡撫廣甯人

乞免加增鹽課疏

藝文目錄

八之四

六十一

石文晟 巡撫奉天人

請減屯糧疏

高其倬 總督鎮嶺人

魯奎善後疏

鄂爾泰 總督滿洲人

平定烏蒙疏 修濬海口疏 興修水利疏

張允隨 巡撫廣甯人

籌酌滇省糧賦疏

尹繼善 總督滿洲人

籌酌魯思元新普善後事宜疏

檀萃 江南望江人乾隆辛巳會魁祿勸縣知縣

禦賊議 守禦後議 廠記

江濬源 江南懷甯人乾隆戊戌進士臨安府知府

條陳稽查屬夷事宜議

滇繫

藝文繫

趙州師

範荔屏纂輯

范承勳土夷歸誠懇請授職疏

看得滇省地處極邊苗獠錯雜其有在全滇之中而山勢險遠林菁深密為滇民腹心之患者則有魯魁一山其地接壤千里內包各種夷獠多屬化外之人號為野賊不知始自何年見今夷目則土名勒昂而改名楊宗周也此輩嘯聚窮山招集亡命乘機搶掠并索取近山保頭錢議勦則潛逃無跡稍懈則復行竊發已非一日矣經前督臣蔡

毓榮於籌滇疏內

題明部議作何撫勦不致滋蔓聽伊酌行在案臣到任以來

凜奉

嚴綸撫恤土司毋容擾害屢次宣布我

皇上威德於聲教未訖之地因遣土弁李踴雷等持諭入山招

撫而楊宗周等既畏

威靈震疊又感

聖化懷柔遂遣目具呈情願傾心向化輸誠并籍所有把守口

岸目兵分晰造冊齎投前來臣見其意雖在自新但招撫

事關重大一面批行雲南司道查詳確議一面與撫臣石

琳提臣萬正色等公同會議遣委臣標左營遊擊莊一虎

臨安府知府黃明及臨元鎮臣馬山會委中軍遊擊郭玉

明協同於十月二十一日前至新平縣地方招撫楊宗周

率領夷目普為善方從化李尚義等及各大小目兵數千

人來迎稽顙聽命歡聲雷動宗周照夷俗斫雞向天立誓

據譯供稱情願真心改惡從善嚴戢土人不許出沒為非

及再取保頭錢并願與

朝廷出力拒守口岸等語取有甘結在案該府將隨帶捐備

海豐
銀牌綢緞等物頒犒大小夷目訖茲據布政使李世昌等
會詳稱魯魁夷獮性頑種別從來不入版圖今宗周等遠
慕

聖化相率投誠環跪誓天刑牲表信一切緝盜安夷保固隘口
悉任擔承具結投報應請量授世襲微職以昭鼓勵楊宗
周合無授以土縣丞普爲善方從化李尚義合無授以土
巡檢之職前來臣復批駁確議且令恪遵

本朝制度照各土司一例剃髮驗明取結具報後據詳稱行
府轉行新平縣親到宗周所轄地方傳諭目民一齊剃髮

望

闕謝恩訖具結詳覆無異臣思魯魁野賊議勦議撫迄無定
畫今宗周等果肯革心向化俾數百年未靖之孽一旦消
弭數郡縣耕鑿之民得以安堵是皆我

皇上天威遐邇以致窮荒不毛之裔効命恐後也查魯魁鄰近
臨屬新平縣界應否將楊宗周量授以新平縣土縣丞普
爲善原住了味地方在新平縣界方從化原住結白地方
在元江府界李尚義原住楊武壩地方在新平縣界各有
隘口責任應否量授各地方名色土巡檢之職仍予世襲

統隸附近有司俾土蠻世服厥職各有子孫繫念咸知慎
惜名器不肯復蹈前非是亦羈縻遠夷之一道也惟是夷
獠情性無恒目前雖已重誓剃髮投誠往後儻有跳梁越
分臣等仍當整勵兵馬嚴加防範不以今日之請授微員
而敢弛日後之備禦也至宗周等所住地方確查委係深
山窮谷並無平坦之處可以建設城池其夷目土兵把守
要隘亦聽自行開墾瘠薄山地刀耕火種以資養贍免其
開報稅糧合併聲明
石琳進呈編輯全書疏

臣看得全書上關

國課下係民生奉

旨令詳察細閱有無應行更改增刪明白確查具奏仰見我
皇上愛民為念四海為家誠恐沿習既久有不便於民之處更
改增刪為萬世不易之章程也臣安敢不兢兢矢慎以仰

副

宸衷惟是滇南僻處邊陲禹貢列諸要荒之服宋祖棄諸玉斧
之外我

朝定鼎無遠弗届自順治十七年歸入版籍其賦役大概準

諸明朝之制而因襲之後因吳逆鎮滇剛愎自用擁兵加賦以致民不堪命今幸

聖政維新重觀天日臣接部咨行司道府會議前來臣又採訪輿情考稽舊籍其亟應議減刪除者有八焉一全滇屯官田畝之糧過重宜減也按明初沐氏鎮滇置設衛所將三分軍爲差操七分軍爲屯田卽徵租以養軍又有名爲官田者給指揮等官爲俸食聽其招佃收租計官屯田地每畝科租自二斗至四五斗不等較民賦之每畝三四合至五六七八升不等者則十數倍矣蓋當年以重養軍原非

上倉糧米猶之佃民之納租於田主也迨我

朝開滇以來兵威震疊將明時指揮等官裁爲廢弁軍餘改爲編民其時吳逆暗握邊權按昔日之租額改爲正供之糧額相沿至今積逋愈多每年業將未完分數職名疊次冊報

題參降革罰俸勒限嚴催在案計自康熙二十一年起至二十六年止新舊帶徵共計未完丁折銀六萬二千九百八十餘兩未完米麥穀豆一十三萬四千五百七十餘石差檄交催法盡計窮究竟完報無幾豈真官吏罷玩軍餘抗

道者乎總緣屯官田地與民田接壤相攬其地利高下天
時雨澤人力播種事勢皆同而糧賦輕重各異况雲南原
係山土瘠薄之區刀耕火種之地較之蘇松膏腴田地所
稱財賦半天下者額重亦不至此大爲官民交困今議將
新舊裁併屯賦錢糧除草場地租馬場人丁學租照舊徵
收外其實在田地照分歸州縣民賦上則例起科計實徵
銀一萬九千四百九十三兩零正耗米二萬三千七百二
十一石零正耗麥三千四百一十六石零於全書內更改
者也一黑白二井鹽課過重宜減也查全滇鹽政考內鹽

井有九除阿陋等六井年該課銀一萬六百四十九兩三
錢六分井小課少辦納猶易不議外查明時黑井額課二
萬六千六百餘兩白井一萬五百餘兩琅井二千四百餘
兩此辦課之舊額也自投誠僞總兵官史文開報黑井課
銀九萬六千兩每觔徵銀一分六釐白井課銀二萬八千
五百六十兩每觔徵銀八釐琅井課銀九千六百兩每觔
徵銀六釐此係明末亂時額外橫加較原額不啻數倍矣
滇之竈戶從井汲滷始方鍋煎其柴薪背負肩挑人力工
本所費既繁又復加以重課則竈困矣行鹽之商率皆朝

謀暮食之人非若淮浙巨商挾重貲而行運也且駝運於崇山峻嶺脚價倍費豈能捐本而賤賣則鹽價貴而夷獮遂有經時不知鹽味者矣卽如浙鹽課價上則每觔不及二釐下則不及釐許又如附近之川鹽每觔只完稅六毫八絲同一鹽課何與滇省之課輕重懸殊若此也又查山東福建四川貴州廣西等省雖省分大小不同鹽課多寡不一而滇省僻處天末環夷褊小之區不惟不能與小省之課同例而且倍多於大省此滇民之甘心食淡地方官之不能督銷者職此故也今議以黑白二井照琅井每觔

六釐之例黑井除減川額外歲徵銀三萬三千八百四十一兩白井徵銀二萬一千四百二十兩琅井徵銀九千六百兩并阿陋等六井徵銀一萬六百四十九兩三錢六分共課銀七萬五千五百九兩三錢六分遇閏加銀六千二百九十二兩四錢四分零於全書內更定者也一開化府之加糧過重宜減也按開化僻處萬山界連交岡猓夷環雜向隸臨安府轄九土司中之王弄安南教化三長官司地也明時分隸蒙自阿迷師宗維摩等州縣於康熙四年土酋王朔等作叛吳逆勦平編爲八里委署臨安知府曹得

滇東
七
舊勘丈額田七百五十九頃三十五畝六分零不照民田
科則每畝科米一斗六升三合共科正耗米一萬二千八
百石四斗五升三合零載入全書查通省民糧惟河陽縣
上則田每畝徵米八升一合零爲滇省最重糧額矣今開
化比河陽又加一倍昔年未設府以前在蒙自等州縣每
畝不過二三升及政府之後驟加如許同是此項田地不
過改州隸府何致今昔懸殊夷民受累今議將開化府錢
糧除人丁條編差發課程商稅等銀照舊徵收外其原額
田酌量改照河陽縣之例共徵本米六千二百一十三石

八斗一升二合一勺九抄每石仍帶耗三升於全書內更
改者也一元江府新增糧米過浮宜減也按元江舊置土
府地處極邊四面環夷種類迥別地皆崎嶇山谷田畝免
丈每年認辦米一千九百三十石二斗一升零地畝銀二
百二十兩一錢九分零附額徵花斑竹差發二項共銀六
百二十一兩一錢七分零商稅銀三十五兩二錢自改建
流府編爲六里其時官兵駐防糧運不繼吳逆遂令暫爲
設法於額糧之外新增米四千七十石二斗一升零田錢
地租銀五千五十三兩二錢三分六釐茶商稅銀一千六

十四兩八錢普洱無耗秋米一千八十四石浪媽等六寨地租銀二百八十五兩查元江屢遭殘破之後芟芟子遺何能辦納驟加數倍之糧遂致荒殘愈甚今議將該府夷糧除原額銀米商稅照舊徵解外其新增銀米各減一半實徵新增并原額米共四千五百六十五石二斗二升零浪媽地課并原額差發等銀共四千六百一十兩四錢九分零於全書內改正者也一通海縣夷糧及南安州附徵裁併磽嘉縣條編宜減也查通海縣六寨田地五十七頃七十二畝零額徵糧一百六石五斗九升三合每石科銀

三兩七錢六分有零較該縣民賦實重二倍夷民困苦難堪今照議新定民例科則實徵銀一百一十二兩六錢二分零米八十三石二斗九升零麥二十三石三斗零以昭畫一磽嘉縣原額田四十八頃八十八畝三分零共徵秋糧一百三石五斗六升四合零每石編銀四兩二錢四分零共徵銀四百三十九兩三錢九分零較全滇之額固屬偏重今既歸南安州附徵應將磽嘉縣條糧照該州每糧一石編銀一兩四分零之例實徵條銀一百七兩六錢七分零米一百三石五斗六升四合零均應於全書內刪改

者也一麗江土府失額銀米宜免也查麗江界連吐蕃古
稱荒服原額米七百七十四石一斗三升零麥一千六百
三十九石五斗六升零地畝銀二百七十五兩三錢五分
零外認納條編銀五百三十兩一錢後因蒙蕃出犯將該
府所轄金沙江外中甸地方復估其中甸等處額徵米一
百四石六斗八升零麥四百五十八石五斗一升零已於
康熙十年

題豁免徵迨吳逆反叛又將金沙江以內喇普地方割送蒙
蕃該秋糧二百石編銀六十六兩四錢三分久經無徵該
土官賠補將來賠累無窮且未便將無地之糧仍載全書
况中甸業經免徵則喇普亦應援免今議應於全書內刪
除者也一建水州無藝之徵宜革除也查明時設臨元參
將一員其日用等物派諸夷民計歲派村寨年例銀九十
二兩及子花檳榔核桃松子木耳乾笋麻子油月柴每年
變時價銀二百三十四兩四錢一分零又派馬料八十石
一斗零高糧二石原非正供錢糧實係私派橫徵因吳逆
搜查投誠知府范應旭呈報邀功遂編入額豈可因仍陋
弊今議應於全書內刪豁禁革者也一無徵之場課宜豁

也查新平縣明直銀場易門縣老場銅廠自明至今開採年久今苗斷礦絕商匠逃散課稅無徵官民賠累不堪經
臣
援

詔具

題部議未允但礦廠非同田地有耕有穫錢糧易辦此乃全憑造化有無難必今既碕老山空而課稅不免節年俱係各官捐賠但年復一年焉知不派累小民豈可以賠補之項刊載全書今議將新平之明直場課銀三百三十兩九錢六分遇閏加銀二十七兩五錢八分易門之銅課銀二

兩老場爐課銀二十一兩六錢一併於全書內除免者也以上各款如屯賦之太重乃明時之相沿但時異勢殊軍旣爲民衛所旣併州縣而壓欠歲積官民交累又如鹽課之過重商竈困於徵輸夷民苦於淡食又如開化之加糧元江之新增乃吳逆邀功橫徵麗江之喇普失額銀米係吳逆割送蒙番以及建水之私派亦係吳逆搜查貽累通海南安二州縣之重糧又新平易門之明直老場荒廢賠課今當更造全書

聖諭諄諄惟恐一夫不獲其所此正邊境黎民猶解倒懸之日

也臣遵

旨會同經管錢糧諸臣再四參酌敬陳各款恭候

聖裁以垂永久再照石羊等廠歲有額課但苗礦之有無難期
永遠今雖造報似未應列入全書仍照舊每年將抽獲之
課造冊報銷可也

王繼文請豁免加增鹽課疏

看得黑鹽井月增課銀二千兩向緣吳逆自秦入滇官兵
家口不下數十萬食鹽衆多行銷稍易因而

題請加增原非行鹽舊額迨全滇恢復之後民多流散戶口

寥寥課額虧欠難徵於康熙二十一年經臣會疏具

題將月增課銀二千兩遵奉

俞旨減除今於奏銷康熙二十七年各鹽井課稅案內准到部
文仍令將此項銀兩自二十九年照舊徵收查滇省自平
定以來仰荷

皇恩遐播商民安享太平固已有年但逆屬家口盡行起發投
誠人員已經安插各省見今戶口所增無幾食鹽甚少行
銷實難見在月額銷鹽四十七萬觔徵課七千八百餘兩
尚苦歷年鹽壅課通商受催比官羅參處歲不能免曾經

前任撫臣石琳於全書案內將課重價貴情由
題請照琅井課則議減在案今若將此項課銀照舊增收則
增課勢必增鹽鹽愈壅而有司無地疏銷卽仍不增鹽價
愈貴而窮民益難買食商民滋累較深各官徒受參處
國課仍然虧欠究無裨益是現在之額專望議減而已豁之
銀萬難加增茲據布政使于三賢驛鹽道王照詳據各該
府州縣并商竈軍民紛紛籲訴會詳前來所當仰體
皇上愛養商民至意據實入
告伏乞

勅部查議將此項銀兩照前豁免則井竈商民均沐
皇恩永永無極矣

石文晟請減屯糧疏

爲密陳屯糧之重仰祈

睿裁以廣

皇仁事竊查滇省屯政因明初沐英世鎮雲南將帶來官兵分
作十分以三分差操七分屯糧卽以七分屯糧之租養三
分操軍此卽古之寓兵於農原非上倉糧米可比迨我
朝定鼎順治十五年關滇吳三桂遂將昔日之租改爲額徵

之賦及後變亂之時罔恤民艱任意坐派使各軍紛紛逃散因而遺累存下典鬻賠納苦難殫述幸賴

皇上天威殄逆民得以安但浮糧過重仍困輸將計恢復之後自康熙二十一年至二十七年屯銀米穀等項歷年拖欠此非軍戶敢於頑抗亦非各官不善催科總因糧額六重血比難完業於康熙二十八年內經前督臣范承勳署巡撫時特疏題請分年帶徵隨蒙

皇恩特頒

上諭朕念雲南百姓前會供億王師繼又遷移叛屬家口運送

勞瘁本年正賦輸將尚屬艱難復令帶徵逋租必致益滋困累著將歷年所欠屯賦七萬一千二百餘兩米麥等項十萬七百餘石盡行蠲免以示朕軫念民生至意欽遵在案則彼時題請帶徵早蒙

皇上睿鑒中矣况各衛所久經裁歸有司是在前日猶存軍戶之名在今日則無軍民之別一切徭役自應一視同仁乃查通省民賦上則田糧最重者莫如河陽縣每畝八升一合八勺三抄其餘五六升以至四五合而止上則地稅最重者亦莫如河陽縣每畝五升九合一勺一抄其餘三四

升以至三四合而止及查屯田每畝則有七斗二升六斗
八升五斗六升至四斗五六升不等屯地每畝亦有三斗
八升至一斗五六升不等夫軍民田地阡陌相連肥磽相
若天時人事耕鑿播種亦無不同何至輕之屯額比至重
之民賦尚有四五倍之數若較輕額則屯賦之與民賦竟
有十倍之重所以屯軍終歲勤動所收之穀不遑瞻顧父
母妻子惟事納糧而究竟不能以一畝之出全完一畝之
額數康熙三十八年臣叔石琳撫滇時曾於奉

旨編輯全書案內將此屯糧重困敘入瀝陳未經部覆而以後

督撫臣未敢覆請者蓋以國用浩繁豈容遽議輕徭况各
省屯糧皆重尤不便獨為請減是以前撫臣王繼文不得
已於康熙二十九年有屯荒減則貼墾之請也但浙江等
省屯軍現今領運且有船隻行月漕截等項給贍滇省屯
軍則無此項贍養兼之衛所既裁軍卽是民則與別省迥
異况此軍係沐氏帶來官兵並非發遣有罪之軍所納正
供似應與民一體矜恤臣於康熙二十二年守開化時早
已深悉今撫茲土見烟竈相連林林總總生聚實繁大非
昔日氣象此雖邇年以來前督撫臣撫綏之功實沐

皇上柔遠洪恩所致惟此一項因吳逆作亂時各軍多半逃竄
殲逆之後前此逃丁或遭兵火或戀他鄉聞未回里以致
遺糧賠累本以最重之糧又復包賠逃戶日復一日重復
更重故於康熙二十八年以來歲歲不清每遇奏期各官
俱愛功名竭蹶借墊者有之以欠捏完者有之遇一陞遷
事故便束手無策百計哀求逢人募助洵不可悉數也臣
自入境以來目覩荒蕪田地甚多百姓甚眾又抵任後披
閱各屬詳驗報墾無幾隨行飭催旋據百姓紛紛具呈熟
糧額重無力開墾懇請題減復批司道查詳所議會同總
欲爲民請命臣思減賦薄稅非臣子所敢輕議祇因多寡
之數甚是不侔苦樂之形異常各別若不據實上達負百
姓卽負我

皇上矣况滇省僻處遐荒係外域觀瞻之地不得不冒昧陳請
如荷

聖鑒將此屯糧悉照河陽縣則例起科則不特現在軍餘易於
輸納卽未墾荒產臣自鼓勵各地方官加意勸墾亦無有
不踴躍樂墾者也仍將墾過數目隨卽具報按年科徵是
減賦於今日安知不增賦於將來也理合恭疏

題請

高其倬籌酌魯魁善後疏

為詳籌永遠宵謐之策以除野賊積患事竊照雲南魯魁

野賊為害地方情節及各大頭目現就拘繫勦捕經臣另

疏詳

奏在案若不趁此勦捕既施之後詳籌調劑雖目前暫安難

期永遠宵帖欽惟我

皇上聖神文武中外乂安乃猶

宵旰孜孜勤求治理臣荷封疆之寄千載一時何敢因循故轍

苟了目前仰賴

日月之燭照不避紛更之小嫌謹隨地方形勢就臣愚昧所知

籌酌數端冀得永除野賊之患稍靖地方所有各條謹臚

列於後 一雲南歷來野賊頭目平時皆居元江新平之

間若一經生事官兵勦捕則遷入威遠土州及普洱茶山

等處蓋因素係伊等瓜分討保之地夷民歲歲納銀如同

租戶甚至井鹽挨日收課商茶按駄抽銀客賈裸民任其

指使供給食米傳報聲信官兵所向賊已早知消息賊眾

所潛官兵難得踪跡所以查拏不易勦捕頗難今雖加懲

創目下暫安若不趁此安營設防爲經久之計空虛之地
廣袤二三千里內通哀牢外略異域無兵彈壓必仍爲野
賊暗佔每年索保可得萬有餘金以此招養賊黨必將復
聚爲患臣細籌形勢應添設普威一營置參將一員守備
二員千總四員把總八員兵丁一千二百名令參將帶兵
五百名駐劄普洱令守備一員帶兵三百五十名駐劄威
遠又守備一員帶兵三百五十名駐劄茶山其餘汛地量
分千把帶兵防守內制野賊外控土司再加以員弁得人
整頓不怠則此一方野賊之患自可消弭矣 一野賊巢

穴根株全在元江協新習營所轄之地向來營制新習一
營止屬臨元鎮管轄與元江協無屬故元新兩界之間一
有事端未言勦捕先爭交界互相推卸遲誤事機比及用
兵又復參差前後呼應不靈臣請將新習一營及所擬新
設之普威營一併皆歸元江協管轄仍令臨元鎮統轄則
聯絡一氣功過相關於調遣巡防均屬便利矣 一威遠
土州之地包魯魁哀牢西南一面歷來爲野賊逋逃之藪
野賊敢於恣肆者固由文武玩愒然亦以有此威遠一路
可逃及威遠土官可恃也威遠土知州刀光煥平日苛索

多端夷民苦累此次又隱藏野賊通風餽食令其實報屢
檄不遵經臣一面摺

奏拘拏一面發藩臬二司秉公詳審容臣另行具

題外威遠土州應請改土歸流一則雲省門戶堅完再則夷

民如出水火其地請設撫夷清餉同知一員兼管鹽井經

歷一員兼管司獄事并大使二員分管按板抱母及各處

土井煎辦鹽斤再猛班地方離威遠三百餘里應設巡檢

一員就近辦理民事令各員盡革土司歷來苛派項款與

民休息自此以漸化導整頓則歷來野賊棲託之藪可漸

變成內地而夷民永遠得免土司苛派之苦再查威遠乃

極邊瘴癘又係初闢之地各員請照例揀選調補以三年

為滿如果稱職請照麗江府改流之例保

題陞用以示鼓勵則新設之員益加奮勉矣 一楊方普李

四姓土官向係招出賊目授以土職原期約束夷人安靜

地方今既不能約束族舍反聽藉勢為非

聖朝名器何可濫加查李姓土職久因犯罪革除外此次糾眾

騷擾者皆方普二姓族人及其項下夷獠方普二姓土巡

檢先事不行鈴束事後不能捕擒甚屬溺職查方紹祖普

成忠皆屈請襲之年現在請襲應請永遠停其承襲以示懲創又土縣丞楊世恩此次野賊之內無伊宗族一人亦無伊屬夷獮又親率土練隨官兵深入勦捕應仍留其世職以示獎勵 一各處既擬設官添兵則俸薪兵餉以及役使等項均需支給雲南歲歲借他省之協濟豈容更增繁費查威遠之新開按板抱母二井前於遵

旨覆奏鹽務利弊事案內計一年可出鹽三四百萬斤請以所出之鹽分銷各屬可以平減通省鹽價今黑井已經加腳減價白井已有沙滷分銷景彌雲阿四小井其價原不過昂惟琅安二井之鹽消售於臨安等處者其價稍貴今又有新經查出麗江之井可出鹽息二千二百餘兩將此減抵其價亦平除於鹽政內另行具

題外查按板抱母二井從前為野賊及土官土棍所踞不但無分釐歸公兼之野賊騷擾商販亦裹足不前今經驅除整頓商販流通計一年約可出鹽四百餘萬觔可獲息銀二萬餘兩以充兵餉可以不用另行請增再普洱一帶又報出土井數處向亦因野賊阻撓擅利自肥今現陸續清查整理可將所出一併添助創設之費至兵米一項元江

威遠普洱皆產米之鄉應就近籌撥可也 一施和尚之
姪膩勒糯利糯片等向來亦非安靜之人此次施和尚被
殺膩勒等皆隨官兵奮勇搜捕賊黨頗為盡力應寬其既
往但若縱令仍各居遠寨漫無稽查亦恐將來滋事臣請
將膩勒糯片糯利等并其妻子皆令移入元江府城居住
凡有出入皆報明文武官庶該管各官得以稽查拘束而
夷日本身家口俱在城中知所顧畏必不敢為非矣 一
威遠土官刀光煥及其犯事子弟將來若仍令留居故土
必致鼓惑滋事請將其家口移至省城安插臣酌量料理

給以恒產俾令得所則萌蘖不滋釁端俱息矣 一向來
元新一帶裸夷習於討保之風其頭目每年所得成千累
百名曰年例錢其後生每年出外一次亦各得三四十兩
名曰鞋腳錢且所到之處醉酒飽肉滿意而歸利之所在
趨之若鶩更兼元新各寨多係各目故居其餘零星小寨
亦各有頭腦耳濡目染以為徒手可以致富常思起而效
之若不嚴加防範難必其故態不萌查各野賊出入有地
討保有時九龍江口是其入土司之要道請於九龍江口
相近扼要之處及各渡口俱設汛盤查或江外之裸夷欲

往江內江內之猺夷欲往江外者皆令該管官給以印票
載明人數如山海關之例往還按數稽查卽茶山客商及
官弁所差兵役俱一例盤查以嚴出境滋事之弊再元江
新平所屬村寨俱令地方官做保甲大意編立里甲記其
人口名口歷來野賊討保必在秋成之後請每年令地方
官於十月十一十二正月四個月之內不時親往稽查如
出入者多必係索保務行跟究懲處不令稍有脫漏則要
路之出入旣嚴地頭之稽查又密形格勢禁自不敢爲非
行之旣久積習漸除餘患自消矣 一威遠土州向來土

官不容夷人應考恐其入學與之抗衡又同族爲婚者甚
衆倫紀未明除同姓爲婚已飭該管官諭禁臣又與撫臣
楊名時嚴飭各員勤講

聖諭加意化導以變猺俗再請於威遠設立義塾數處令夷人
子弟有志讀書者入塾誦習先暫令於元江附考請

勅學臣就其粗通文義者量於元江額外取進二三名以示鼓
舞俟人文漸盛再請設學庶猺俗自變文明日啓矣 一
威遠土州向來差發甚少其田土所出盡爲土官苛派入
已今臣已令大理府同知佟世蔭守備楊國華將其田畝

海豐
三
及各項錢糧逐一清查凡有土官額外苛派之項行令盡
數裁革其應增納正額亦令酌照地之肥瘠更定賦額以
資經費再查得威遠普洱九龍江等處土田之美大勝雲
省腹內之地其山頂多水其禾一年兩熟然猶拋荒甚多
者一以土夷人少不能遍耕再因野賊騷擾歲無甯宇若
使土田盡闢不但軍糈足資更可化爲樂土其間尚有可
開設州縣之處但目下人戶稀少江邊烟瘴未消未可驟
言應籌之以漸臣已與撫臣楊名時令各地方官加意勸
誨本處夷民廣行耕植又令招徠別處願墾誠實之民赴

彼墾種請照雍正元年定例旱田十年陞科庶人烟漸盛
嵐瘴自消居民愈多則賊風愈息矣 以上十條臣就一
得之愚籌酌調劑謹會同雲南撫臣楊名時提臣郝玉麟
合詞具

題伏乞

皇上睿鑒勅部議覆施行

鄂爾泰平烏蒙謝恩疏

伏念苗獠之性比於犬羊卽不激成亦時反覆總兵官劉
起元之罪猶不在僨事而在辱國以全滇之兵加以所轄

三營軍有鎗砲賊只標弩以一當十非關弱強無論未事
之先首告造謀者有人密報聚眾者有人劉起元責懲怒
罵既不究察亦不防備罪不容於誅卽果變起倉猝原無
知覺亦當整兵力戰或據險待援勝則賊降敗則自盡猶
不失爲死事乃並不一戰妄欲招安直至逆猥重圍兇橫
益甚猶妄意魯甸不反仍同遊擊汪仁賄買賊目欲保全
家口奔赴東川致盡被殺於離城二十里荔枝河壩面於
是賊勢愈熾謂官兵伎倆不過如此以致東威猥屬羣起
附和肆布流害人心惶惑據奔逃兵丁客民備述形狀莫

不痛心切齒在鎮將之罪卽總督之罪此臣之所以慚惶
忿恨而刻難自寬也雲南邊隅盡屬苗獠獷悍愚頑不服
約束每有藐官虐民殺兵奪砲而互相隱諱以爲老成者
凡茲前事人所習聞臣自叨荷

殊知寄以重任殫心籌畫矢志清除不量己力不恤人言並非
好大喜功實亦隱憂遠慮計五載以來仰賴

天威凜遵

訓示雖難言條理已少具規模今烏蒙一變儼若不支惟

聖明可寬臣之罪天下誰諒臣之心將懦者得以藉口強者亦

真繁 八之四

藝文

音

樂於安身謂苗獮原不應懲創謂邊疆原不必開闢皆鄂爾泰好事皆鄂爾泰啓釁竊恐因循瞻顧復蹈前轍日復一日官復一官數十年後或有事征勦則力倍功半猶未可以圖甯事有原因誰實貽戚臣卽骨化形消無辭負恩誤國言念及此寤寐難安故烏蒙逆獮務期立速屠滅俾聲威遠震免生夷心以堅衆志庶此一反覆轉可以謀甯謐慮不止爲烏獮事實關係諸蠻此臣之所以懇請解任督師不欲旁貸者也茲蒙

聖恩原宥慈諭屢頒臣自知淺陋不能仰體

天心冒昧無辭悚惶倍切至於遊擊汪仁知縣審枝大等倉猝遇害累及妻孥著臣查明具奏加恩賞恤捧讀

恩綸感深存沒臣現查烏蒙文武各員內有効死盡命者有奔逃被殺者有牽累遇害者有衝突苟活者有在外無恙者有因遠倖免者其効死盡命時則遊擊劉崑馬秉倫把總周世美等忿激殺賊各帶重傷陣亡又司獄陳天錫見鎮將不戰於先二日卽手刃其妻妾自刎於官署此四員者忠義凜凜堪膺賞恤如遊擊汪仁守備楊天階千總李發早部士奇把總張必宏王永福外委千總王起鰲王國卿

等係奔逃被殺俱無可矜憐如通判劉鎮寶署知縣賽枝
大教授李焜知事劉懋美巡檢葉祚徽係牽累遇害俱堪
賞恤如守備金必信巫茂崇干總王家彥蔡之斌把總卜
貴汪玉丁蕃劉士俊賴君翼等俱初係奔逃繼衝突苟活
者俱應革職究擬因現在軍前効力贖罪俟事竣再議如
烏蒙知府陳克復永善知縣杜思賢因公在省署經歷胡
珣教諭趙靈先委辦差干總竊功成養病住威把總李龍
施宏義差接家口俱在外無恙如典史厲錦巡檢魯進修
把總陳聯科鄧又禹俱因遠得免其該鎮兵丁現出隨營

者已一千二百餘名仍在陸續投到者尚無確數至於遇
害諸文員多未攜帶妻孥有遊擊劉崑之妻張氏見劉崑
傷亾逆眾兇橫遂顧謂二女曰我為命婦汝為官女豈可
辱賊乎惟一死以報君恩遂殺其二女時有子僅三歲張
氏囑其生子之妾吳氏汝尚可勿死撫此子以存劉氏後
語畢即自殺妾不受亦自殺及恢復烏蒙後控獲劉崑之
子並乳母婢僕共五口臣聞信隨令護送至省親視撫養
劉崑尚有胞弟武生劉峨義子武舉劉頽先俟事少定當
資送回籍仍咨明四川撫臣囑加意照看以為忠義者勸

其遊擊汪仁之妻並子女僕婢等遊擊馬秉倫之妻並僕婢等又守備巫茂崇之妻把總汪玉之妻及兵丁家口各男婦等共搜獲五百餘人現已分養周恤均勿令失所雖大節有虧生死俱無關輕重而至仁普冒鄙賤皆不外生成臣實切感傷亦愈深慚愧謹

奏

按疏內楊天階李發早邵士奇張必宏王國卿五人後復查明俱係死事另疏具題一體賜恤

鄂爾泰修濬海口六河疏

為報明修濬海口大修六河並請定章程酌留需費以興水利以濟民生事竊以雲南省會向稱山富水饒而耕於

山者不富濱於水者不饒則以水利之未講或講之而未盡其致斯不能受山水之利而徒以增其害也故籌水利莫急於滇而籌滇之水利莫急於滇池之海口其上流為昆明呈貢晉甯昆陽四州縣下流為安甯富民二州縣一水所經為六州縣所係流通則均受其利壅遏則均受其害故於滇最急滇池之源來於城北之盤龍江經城之東而流於南會呈貢晉甯之水潴而為池折而西流至昆陽州界復北折而倒流由石龍壩至於安甯富民之北而入於金沙江此滇池之形勢也滇池即昆明池土人名之為

海海之大周圍三百餘里環海之田資以灌溉號爲膏腴者無慮數百萬頃每五六月雨水暴漲海不能容所恃以宣洩者唯海口一河而兩岸羣山諸箐沙石齊下沖入海中填塞壅淤宣瀉不及則沿海田禾半遭淹沒明宏治時巡撫陳金開渠濬沙築壩鑿石民困以甦自此遂有歲修大修之例而不知海口之內有牛舌灘洲二處梗塞其中致海口內外不能通暢萬厯初復興修作亦只於牛舌洲之左豹子山之下竭力疏濬其根未清故其患未息至今歲修歲壅殊非長策臣委令糧儲水利道黃士傑親往查

勘令將海口河道溯源窮流逐一修濬務期利興害除毋爲苟且補苴之計嗣據黃士傑回報勘得海口一河南北兩面皆山俱有箐水入河每雨水暴漲沙石沖積而受水處河身平行易於壅淤如北有白塔臘龍二箐水合瀉入河名洱宗聞壅淤之患猶小南有瓦泥箐邢家園二水屬呈貢縣轄名普安聞有羅武箐一水屬晉甯州轄名清水聞有天目芭蕉二箐水屬昆明縣轄名新村大閘皆直瀉河中每疏濬於農隙之時旋壅塞於雨水之後不究則淹沒堪虞開挖則人工徒費沿海人民時遭水患皆甚苦之

行至平定哨一閘係雲龍箐水歸河之道正值水陡流急之處相度形勢諮詢輿情咸稱閘南宜開子河一道引普安清水新村等閘諸水同至平定哨閘入河則泥沙石子不能停住一勞可以永逸復行至海口駕船循視見有舊埂一條沉埋橫塞其中埂外龍王廟前有牛舌灘又側而下有牛舌洲俱阻攔出水不能直洩詢諸土人此從前築埂以濬海口之遺基也其一灘一洲自古所有原未議修隨於大海近崖處用竹竿試探水深八九尺出海口外於龍王廟左海門村試探水僅深二尺五寸於龍王廟右近

豹子山之牛舌洲試探水則止深九寸皆因三重壅塞不能暢達以阻海口出水之咽喉因令各爲丈量牛舌灘長五十七丈上廣十丈中廣十六丈下廣九丈頂高一丈牛舌洲長五十八丈上廣九丈中廣十三丈下廣九丈頂高一丈二尺應將此一灘一洲并前一埂盡行挖去則海口疏通沿海田地自無淹沒之虞等情臣復博訪確查卽分委昆明呈貢晉甯昆陽等四州縣照議督修其所用人夫卽令四州縣按名發給口糧并鹽菜等項雖佚道使民歡欣不怨而急公往役體恤宜優於是各州縣人民皆踴躍

從事於雍正七八兩年農隙之時興工所有海口河道海宗普安清水新村等閘壅淤處所悉已疏濬所有老埂牛舌灘牛舌洲等處盡行挖出悉已寬深所有平定哨閘南新開子河一道悉已修通復因晉甯舊河水陡流急阻回新河之水並新建偪水壩一座新河悉已暢流歸入大河又於海口外之石龍壩兩岸山腳俱新築堤埂保障河基悉已堅固所需物料并人夫口糧鹽菜等項合計銀五千六百三十餘兩臣已設法辦理現今四州縣沿海沿河及近海口內外居民既免淹沒并涸出膏腴田畝甚廣現在

飭查另冊具報此在省河道之大宗也至於四境之內河道甚多條分派別各有源流而其最大者莫如盤龍江由嵩明州邵甸里之黃龍冷水二洞及黑龍潭曲折三十餘里至省城東北盤繞京城之東南西三面至西北而入於海故曰盤龍江據委姚安府知府臧珊原任廣西臨桂縣革職知縣劉永濬查勘估報盤龍江修濬河身河尾礮砌石岸壩閘並應增開各子河新築各堤岸應需物料人夫口糧鹽菜等項共估計銀三千二百三十餘兩其次如金稜河自元時咸陽王賽典赤以東郊田多水少乃引盤龍

江水於松羊壩鑿河一道溉田甚廣名爲金稜河俗稱爲金汁河據父永昌府同知甘士琇昆陽州知州劉際平查勘估報金稜河自松華壩至海尾約六十餘里應添修石岸及新開洩水石閘二處需物料人夫口糧鹽菜等項共估銀四千三百九十餘兩又次及銀稜河其源出於城北二十餘里龍泉觀之黑龍潭會白龍潭水經商山麓亦繞城東南曲折入海今開通子河並岔河分入盤江據委安甯州知州楊若椿查勘估報銀稜河卽銀汁河自黑龍潭至馬村通計上下流約二十餘里蒜村一瓦水白龍寺文

殊寺等閘並兩岸堤埂俱應加修需物料人夫口糧鹽菜等項共銀四百一十六兩其次如寶象河在城南二十里其源有二一自岷峒山小龍潭至板橋之東一自黃龍潭至板橋之西於明陰寺前二水會流由官渡以至海約八十餘里據委通海縣知縣臧在莘元謀縣知縣樊好仁查勘寶象河至小板橋分爲三支一曰猓羅一曰官渡一曰舊門溪堤埂壩閘俱請酌量砌礮石岸加築高二四尺不等需物料人夫口糧鹽菜等項共估銀一千一百四十餘兩其次加海源河據委麗江府知府靳治岐查勘海源河

自海源寺至海約二十餘里兩岸土埂俱宜寬修班莊上
下暗洞並沙河堤埂應修築高厚需物料人夫口糧鹽菜
等項共估銀二百五十餘兩其次如馬料河據委署嵩明
州知州張浩查勘馬料河自黃龍潭至海約七十餘里有
白營村豬圈壩上壩溝清明溝以及橋梁二道除人夫照
例外所需物料共估銀四百九十餘兩又次如明通河其
河由三元石閘引注爲金稜河之分派據委澂江府知府
王鐸署晉甯州知州章倫查勘明通河自白沙橋至海尾
三十餘里兩岸堤埂甚屬低矮河身窄狹應修寬券石橋

二座砌過碕二處需物料人夫口糧鹽菜等項共估銀四
百一十餘兩又據委試用知縣以下羅仰錡查勘馬湯白
沙二河其源來自放馬橋至海約二十餘里應請兩岸加
高二三尺河身深寬三四尺需物料人夫口糧鹽菜等項
共估銀五百二十餘兩以上各河共估銀一萬八百七十
餘兩復經委布政司糧儲水利道親勘確核據報無異所
有應需銀兩臣已於查出各項田地變價銀內動用令及
時辦料興工另疏

題明外臣查海口六河並各支河皆足以資灌溉而備蓄洩

海粟
獨因淤塞日久開濬少難以致水不注海田僅通溝高地
惟望雷鳴下區則憂雨積此稻糧豐歉之故實人民苦樂
所關如果山潤以水水良以山俾彼此相資互得其用則
旱潦可爲轉移荒瘠早施補救人力旣盡天必垂憐此
之所以由近及遠歷日積年務期通行成效勿敢怠忽勿
敢遺忘者也惟是旣興工作宜定章程庶可以經久而不
致廢墜查雲南府原有水利同知昆明海並六河以及各
支河巡查濬修是其職分應請鑄給關防重以考成勤則
獎敘惰則參罰其昆陽州爲昆明下游海口在焉距省百

里同知難以兼顧請於昆陽州添設水利州同一員駐劄
海口常川巡察遇有壅塞不時疏通設或冲塌立即堵築
亦請鑄給關防照設書役以專責成至於通省各府州縣
皆有水利原無專員諉卸因循託辭藉口若將同知通判
州同州判經歷吏目縣丞典史等官加以水利職銜凡境
內河道溝渠責令專理除雲南一府仍歸糧道管轄其餘
各屬在地東者統歸地東道管轄在地西者統歸迤西道
管轄仍令各該府查勘驗報各該道考察詳明聽督撫二
臣核酌勸懲則不二三年將通省水利有與無廢而克濟

民生殊匪淺鮮矣抑臣更有請者昆明之六河昆陽之海口及臨安之三河所關尤鉅歲修銀兩不可不酌定查各項正款固不應擅那卽各項盈餘亦未便濫費惟鹽道衙門歲有合秤銀一千五六百兩不等並不在正額盈餘額外盈餘及各項積餘之內而鹽道張無咎絲毫無隱請卽以此項撥作歲修之用昆明六河酌定八百兩昆陽海口酌定二百兩臨安三河酌定三百兩用則報銷仍造冊送部不用則存貯並撥餘銀兩統數積存以備大修之需似於水利民生更有裨益除將通省水利並達川粵河道已

竣未竣現勘加修各大略彙叙

題明外所有修濬海口大修六河並請定章程酌留需費情

由臣謹會同雲南撫臣張允隨合詞具

題伏祈

皇上睿鑒勅部查議施行

鄂爾泰與修水利疏

爲全滇水利已未興修彙叙陳明仰祈

睿鑒事竊惟地方水利爲第一要務興廢攸係民生修濬並關國計故無論湖海江河以及溝渠川澮或因勢疏導或盡力

開通大有大利小有小利皆未可畏難惜費忽焉不講者况雲南跬步皆山田少地多憂旱喜潦且並無積蓄不通舟車設一遇愆陽卽頓成荒歲從前市米一石有價值十兩十五兩之前事後鑒敢不預籌是以臣自蒞任以後仰體我

皇上愛民務本之至意卽詳飭通查令凡有水利毋得膜視并博採輿論合看繪圖務期矢此恆心用資綿力但於治有小補庶幾慮可少寬志未嘗不如此乃迄今六載雖亦次第舉行然興修已竣而獲水之利者僅半已修未竣已竣

未妥並應修未修委勘未確者居半現無成功何論久遠用深歉仄切望羣材此應了禾了事所當分晰開明陳請聖鑒者也除昆陽海口及盤龍江諸河興修情由已另疏具報外查雲南府屬嵩明州之楊林海又名嘉麗澤納龍巨南衝二河之水並受四面山河各水會聚成淀出河口入車翁江達金沙江因河灣迂曲去水甚緩停留沙石壅塞咽喉每將海邊四十八村已成田畝半行淹沒歷爲民患臣詳加察訪海水深止二三尺若改疏河道由丁家屯龍喜村開挖二里許直通河口使新舊兩河並瀉水勢暢流不

獨四十八村可永免水澇而周圍五十餘里草塘均可開墾成田隨於雍正五年秋委員會勘並先將歷年阻撓之矜棍二人枷示河干限以工完釋放於是各士民懽呼踴躍情愿出夫僅資給口糧並未多費於雍正六年春報竣從此田畝歲收並酒出田地一萬餘畝再府屬宜良縣窪地多淹高地無水旱澇不均有需調劑臣先於雍正七年據前任知縣邢恭先詳稟飭諭興修隨於八年春報竣續復委員覆勘所開河共五道一在城東北五里五百戶營之南開長約五里已通池江一在城東三里龍王廟北舊

多積水開長約四里亦瀉於池江一在龍王廟南爲北來諸水所會開瀉水河約十里水不爲害一在城南二十里地名乾墩子綠地無水池一望平衍廢爲棄土於池江邊決一水門開河一道引肥水灌田現已獲濟惟自江頭村起所開引河一道地形漸高水勢難上殊無益灌漑徒費人工復議自胡家營北接舊河另開一道約長五六里甚有裨益現飭於農隙興工約明年春可竣又臨安府有瀘江一水來自石屏州之異龍湖合塌冲象冲二水及六河九湫皆會於瀘江以赴巖碕伏流十餘里出阿迷州入盤

江而碕口碕底石埂十三重阻水不能直瀉每遇夏秋暴雨奔湍四潰田廬淹沒土人稱有神物憑巖欲伐巖石輒有風霾砂石必中傷人經委前任知府張無咎鑿石疏河椎鑿不能入強入不寸許旋果風起砂飛礮礮從空擊下斷工人一指臣據報謂神以庇民豈以虐民總制奉

天子命除患濟民而神弗許是神不靈隨通以誠告以正遣張無咎以文祭畢復督工鑿石應手而碎十三重立盡復將自瀘江至巖碕堤岸八百一十丈自塌冲二河至三河口堤岸四千三百七十五丈并造橋丁椿窠淺諸件一併築

修於雍正八年四月內報竣現已有利無害禾稻倍收再府屬之延水州查自南莊十六營以下暨獅子口郭衣村等八處田地甚多苦無活水但雨澤稍遲卽秋成失望前任知州祝宏以附近南莊之李浩寨山腹中有過泉一道細流不息入地無踪曾竭力開挖不能疏通稟報臣令以穀糠填入向下尋流約三十里流出於州屬之老鼠窠知爲此泉無疑遂穿鑿地道伐木爲廂穴中水湧勢甚湍激隨復開溝導水儼成大渠並酌定規條令挨次引灌而該地田畝皆賴以豐收於雍正七年四月報竣府屬之阿迷

州離城里許有小河一道歷來不通舟楫該署州漆扶助
遵檄疏濬自水泉下遶州城由祿豐鄉直達盤江計三十
二里現可行舟於雍正七年八月報竣府屬之蒙自縣有
縣壩一區圍繞城外平坦寬闊可成沃壤因灌溉無資遂
棄爲曠土查有城南學海據壩上流亦經淤塞若濬深數
尺建閘築堤開溝引水卽可以肥田雖工程不易舉而衆
願速成該知縣王廷諍於雍正七年興修八年冬報竣又
曲靖府屬之尋甸州城南平川沃壤皆可墾土成田緣尋
川一河會尋甸嵩明兩州之水每夏秋積雨一望汪洋加

以馬龍州河水又會於七星橋下衝激尋川之水逆流氾
濫卽附近熟田亦歲被淹沒土人謂自古相傳捍禦無策
臣熟籌博訪就其山形水勢及遠近高低欲使尋川河順
流直瀉必先使馬龍河不爭水道欲使馬龍河不爭水道
必須另開子河俾尋甸嵩明之水皆得暢流並可免衝激
不致氾濫今於雍正七年春面諭陞任知州崔乃庸查勘
督修隨於是年十月興工八年春報竣共用工三萬七千
有零約可涸出田地二萬餘畝但大河中流有整石四十
餘丈務須開鑿而施力殊難復議另濬沙河十五里以收

海豐
全功現委地東道遲維璽就近督修又徵江府城南之撫
仙湖延袤百餘里中流深處可百餘丈以受各山之水亦
名爲海由甯州入阿迷注盤江會流以達粵境每雨多水
沙宣洩不及則附郭之河陽並江川甯州三處利害共之
惟海口一河尚堪疏洩而山溪水漲推砂滾石壅積易而
通暢難明巡按姜思睿會建牛舌梅子箐二壩截兩山之
衝激遏砂石之壅淤今石壩傾頽更無可恃據該知府王
鐸詳請興修臣隨發銀委辦計石工一百七十六丈零首
尾寬深堤壩堅固又增築通水壩六墩以固石壩以滌岸

砂於雍正八年興工九年六月報竣河陽田新涸出三千
餘畝舊田遍種現獲豐收又楚雄府屬之鎮南州舊有水
塘築堤積水以資灌溉名千家壩因傾廢百年水無停蓄
一遇亢旱種插並難臣面諭該知州金鑑確勘詳覆其水
來自北山龍王廟及多蔭廠等處兩旁坡巖壁立四季泉
源不竭會流箐口兩山廻環儼如門扇基址天成蓄水成
塘可灌數十里田畝隨發給銀兩令築壩建閘全用大石
并將外口開寬深毋得省工惜費於雍正八年六月興
工掘出千家壩舊碑一版復指其缺略示以堅完於九年

三月報竣據稱不獨可灌千家并可以周萬戶矣又東川府雖倚山臨川不通河道種稻田者無多餘半爲荒土而城北蔓海一區寬長二十餘里地本肥饒因積水難消棄置已久自割歸滇轄臣經發銀數千兩令前任知府黃士傑於雍正五年開河三道一從馬五寨至魚洞二十里爲左河一從瓦泥寨至水城二十里爲中河一從拖落村至魚洞二十里爲右河建石閘二座木橋四座水消田出業招民承墾該守羅得彥又從馬鞍山開河一道約長十里以濟蔓海從梅子箐開河一道約長十里會合中河及知

府崔乃鏞接任於九年正月加修旋據報竣其餘如嵩明州之寬郎河效古日足二里田畝同資灌溉因分水不均里民爭控飭令開子河一道俾兩里均平九年四月報竣宣威州舊少水田僅資蕎麥知州漆扶助於雙龍山泉會合處建石閘一座於戈山河口建石壩一座左右各開渠一道於嘉惠落水洞旁建石壩一座開渠一道截流引水均可墾田俱於九年八月報竣祿勸州地僻土寒穀難成熟惟正東東南等村可以種稻內有馬家莊等處田高缺水舊有水溝一道久經壅塞前任知州賈秉臣請從山腰

滇縣
紆折鑿石成渠匯復溝水可灌田數千餘畝於雍正四年
八月內發價飭修不數月報竣大理有洱海之海口爲附
郭之太和及趙州鄧川三州縣水利所關因壅塞多年每
遇兩水泛濫海田多傷據前任同知佟世蔭等詳明興修
水得暢流田禾攸賴於雍正四年內報竣又雲南縣有團
山一壩舊立閘三道引梁王山泉灌溉田畝歲久傾圮難
資引灌因開修溝閘並濬清海尾赤河尾業經報竣浪穹
縣因湖水氾濫疏濬鳳羽河等處築堤四十餘丈廂木櫃
五十架業經報竣但補苴一時尚非遠計現復委勘加修

永昌府城外有南北兩河田畝攸賴因壅塞已久歲損禾
苗據該鎮府等倡率兵民用夫一萬餘亦於雍正四年內
報竣以上各件工有大小時有遲速或給發承修或騰那
濟事或奉行官吏加意急公或本地士民出夫協力並未
動項皆已完工內有仍需加修者亦不過增補其各屬地
方如堤壩圩埂溝洞渠塘等類隨時疏築各有稟詳事件
零星俱無庸開敘此外如臨安之建水石屏俱受廬子溝
之患嶧峨之城垣田廬俱受練江猊江之患曲靖之西瀟
湘南甯之落水洞羅平之西北一河新興之玉溪路南之

滇東
三
蜡甸和曲之紅土田趙州之彌渡雲南縣之馬安鄧川之
苴彌浪穹之甯湖皆應疏濬開鑿俾有利無害祿豐縣之
宜重修廢橋定邊縣河之宜建石堤永北府之羊保山宜
建石壩順甯府河之宜建鐵索橋皆應乘時料理庶力少
功多至於通粵河道最關緊要非止便客商實欲資糧運
臣於雍正七年春卽發銀飭修已由阿迷州以下開至八
達共一千五百里造船試行直至土黃有旱路二站亦經
置備車牛並蓋棚店下船至剝隘則徑達粵江因委總理
之被劾原任廣南府知府賈秉臣草率粉飾並未徹底開

通故雖勉強行舟河路尚屬危險現復委員確勘妥議增
修又嵩明州之河口經尋甸東川由牛欄江達金沙江周
環川江復抵昭通以通舟楫雖工程不易亦人力所能現
委試用知縣以下趙世綸等備細估勘繪圖覆奪若得川
粵江河舟通滇會則片帆可達吳楚又不止尋常水利事
矣以上各件臣已切囑司道並詳諭各官實心措辦所需
工費請於變價銀兩內酌量動支敢或藉端侵冒及苟且
塞責者立卽揭參以爲膜視公事者戒惟衆志若一期在
必行庶百務無難皆克有濟且各爲地方貽永遠利賴之

善蹟以仰副我

皇上廑念邊方之盛心亦所以自求福而與有榮幸事也所有全滇水利已未興修彙敘陳明緣由相應會同雲南撫臣

張允隨合詞

題明伏乞

皇上睿鑒勅部查照施行

張允隨酌籌滇省糧賦疏

竊查滇省各府州縣兵多米少之處輓運維艱兵少米多地方米難久貯俱應實心籌畫因時變通務期兵民有益

臣先經與司道再四斟酌并行令妥議去後茲據布政使

葛森會同署糧儲道黃士傑詳稱查滇省額徵民屯稅秋米石共二十一萬九千石四斗七升零額設制兵共四萬七千九百八十名歲需銀八十六萬九百四十一兩六錢零歲需米一十七萬二百七十二石八斗零以額米供支外尚餘米四萬八千七百二十七石二斗七升零以制兵通盤計算米則支放有餘但駐防兵多之各府州縣所徵稅秋糧米不足供支將應徵條銀通融折收糧米以資軍食駐防兵少之各屬所收糧米足以供支仍應照舊輸納

米多兵少之各屬將糧米折解以抵兵餉民免輓運之勞
米無紅朽之虞昆明縣附居省會駐扎重兵人烟輻輳日
食浩繁所徵糧米雖不足搭放應仍將附近各州縣糧米
運省供支毋庸議改其廣西廣南鶴慶永昌永北曲靖尋
甸羅平南甯太和南安鎮雄保山新平文山會澤等府州
縣俱駐有官兵除將各該府州縣額徵稅秋糧米搭放外
仍有不敷會計撥運採買不免滋擾請將廣西等十六府
州縣所徵條編銀兩內除軍舍丁差并差發馬場魚課照
舊徵收及存留錢三俸工應於各府州縣中最遠之里分

輸納銀兩外尚該銀二萬一千七百九十六兩零照數全
折請以每銀一兩折收京斗米一石徵貯各該本倉備放
少有不敷亦撥運無多至米多兵少及無兵之阿迷甯州
路南雲龍雲州鎮南通海蒙自永平姚安元謀等十一府
州縣額徵秋米全數折收并蒙化府雲南大姚二縣額米
改半折收二共米二萬五千七百六十六石零請以每米
一石折銀一兩撥抵廣西等府州縣條銀二萬一千七百
九十六兩零解司充餉外尚餘銀三千九百七十兩有奇
應貯道庫照以一兩折給普洱鎮兵糧安甯晉甯呈貢昆

陽宜良富民河陽新興江川等九州縣稅秋糧米俱撥運
省倉支放石屏州額米撥運臨安府倉十二關額米撥運
大理府倉嵩明宣威霑益馬龍平彝邱北彌勒臨安建水
甯我元江恩樂趙州賓川鄧川浪穹劍川騰越順甯楚雄
廣通景東麗江武定和曲祿豐師宗河西等二十八府州
縣雖各駐有兵以各處所徵糧米搭放并協運鄰倉供支
所徵條銀毋庸改折又麗江邱北之新墾建水之猛弄新
增米石係屬夷糧永行折徵業於奏銷冊內登明毋庸另
議至昭通永善駐有重兵額米不敷搭放經署三省總督

高其倬會

題動支司庫銀兩委員赴川採買輓運接濟條銀毋庸改米
維西營分防之阿墩浪滄二汛兵米不敷 題明以二兩
一石動支司庫正項折給條銀毋庸改折至維西額米不
敷兵食原係酌撥鶴慶麗江倉米加給腳價運供除三站
不給腳價外每年約需腳價銀一千二百兩有奇向於報
部輕齋盈餘銀內動支今停止輕齋應於司庫備公銀內
動給再普洱攸樂威遠鎮沅等各駐有兵額米不敷支放
別無附近可撥今以銀一兩折給不敷買食又當量爲加

增但無項可動今查有永行折徵之易門祿豐羅次定遠并裁歸蒙化之定邊等厯係以米一石折銀八錢徵解茲各屬既以每米一石折銀一兩亦應照以一兩徵收內除題定之八錢解司充餉外所餘二錢通計該銀一千七百五十餘兩作為加添普洱鎮兵丁折給不敷之用至中甸駐防兵丁每年需米一千八十石內除額徵米七百三十三石零不敷米三百四十七石零查該倉節年存米足供四年之用應於舊存米內添撥動支後有不足另行酌議詳請再查道庫尚存節年輕齋銀一萬五千九百八十八兩

零請於本年採買供支以癸丑年為始停止採買仍每年將改米改折府州縣於奏銷冊內分晰登造詳請

題達計倉儲之盈絀因時變通不以為額總期於

國計民生均有裨益相應合疏具

題

尹繼善籌酌普思元新善後事宜疏

為敬陳邊地垂久事宜仰祈

睿鑒事竊照普思元新一帶自雍正十年逆夷悖叛擾害邊疆

仰蒙

皇上天威遠播訓示周詳選將調兵嚴搜痛勦人民咸得安堵
地方悉已救甯經臣具疏

題報在案但邊境險遠界連外域處處深山密箐在在蠢獯
頑苗撫綏固應詳籌防範尤當嚴密一切營汛建制事宜
亟須乘此平定之後以為一勞永逸之圖臣與撫提諸臣
悉心商酌因地制宜量為增改逐條臚列為我

皇上陳之

一攸樂營汛官兵宜移駐思茅也安營設兵務期有用天時
地利均要得宜查攸樂為普鎮右營孤懸瘴地僻處萬山

水泉微細食用艱難兵丁多係單身最易逃走人人視為
畏途更難招募自攸樂至思茅相距甚遠在在深山險箐
塘汛兵孤勢難存立一遇有事聲氣隔絕思普之兵不能
及時應援即太平無事而烟瘴甚盛水土惡劣兵丁多致
傷損其存活者亦皆疾病纏綿筋力疲弱難以彈壓地方
臣在京時荷蒙

聖諭令將三省事宜與大學士鄂爾泰悉心商酌鄂爾泰即以
攸樂營基未妥囑臣另籌臣細查形勢與撫提諸臣再四
斟酌攸樂一營必須改移雖前經同知郭倫議詳改建於

滇黔
攸樂箐口已據報完城工五分旋遭兵火究之與攸樂相
去不遠烟瘴亦盛終非長策查思茅地方高爽水土和平
北接普威南控江壩實爲形勢之要自宜將攸樂一營撤
歸思茅將右營遊擊移駐統領並將攸樂同知亦移駐思
茅與遊擊同城改爲思茅同知換給關防將思茅通判一
缺裁汰車里江外各猛地方係宣慰司管理所有錢糧責
成徵解其攸樂茶山一帶總屬同知管轄錢糧俱隸徵收
庶控制得宜兵民均有裨益

一普洱郡城宜添知縣一員以資治理也普洱居滇省極邊

之地幅員甚廣料理需人原設知府一員事無巨細俱係
知府管理雖設有經歷僅可備供差遣知府遇事公出並
無印官在城或遇緩急別無一員幫助非所以重地方也
應請添知縣一員駐劄府城所有倉庫錢糧戶婚田土監
獄事務悉歸經管再添典史一員以備任使知府得有餘
力專司總理庶佐理分任各有其人彼此相資緩急有賴
至新設之縣仰請

欽定佳名鑄給印信以重職守

一普鎮三營兵丁宜酌添也普洱全境縱橫綿亘約計六七

千里額兵二千四百名除親丁公費及分佈塘汛外存城之兵甚少前歲猥賊猖肆兵力單弱守戰不能兼顧及調兩地官兵遠路奔馳而賊勢蔓延地方已遭荼毒是設兵不足猶之乎無兵也但增兵大多又慮山路險遠糧運維艱今再四斟酌每營必須添兵一百連原額計算每營各九百名三營共二千七百名庶極邊遼濶之地可以守禦有資矣

一三營汛地宜籌酌妥當也查普鎮中營原設等角通關哨兩大汛左營原設抱母鎮沅新撫恩樂四大汛右營原設猛旺思茅兩大汛又中營原設整董一小汛左營原設猛班三圈二小汛右營原設猛旺倚邦猛烏慢林猛養五小汛凡小汛兵丁每處或四五十名或二三十名離營遠散碎零星平日徒作踐夷人遇事即先遭殘害况多分小汛大營兵單欲調動則前出後空欲分應則顧此失彼前車之鑒歷歷可指是兵勢散而無濟不如合而可恃也應將三營之整董等小汛一併撤歸大營以壯聲威以收實用至於三營大汛又有當詳加斟酌者中營通關哨一汛界在把邊阿墨兩江之中實係元普咽喉應撥中營守備

一員把總一員外委把總一員帶兵二百名駐劄又把邊
渡口亦關緊要應於通關哨兵內撥出外委把總一員帶
兵五十名駐劄遊巡江崖等角一汛接壤元界之里仙江
實係夷獍出沒之地應撥外委把總一員帶兵五十名駐
防此外尚有兵六百五十名遊擊一員千總二員把總三
員外委千把四員隨總兵駐劄普城又左營遊擊原駐威
遠守備分駐鎮沅今查威遠地方烟瘴甚盛鎮沅爲適中
之地風俗強悍較威遠緊要應將遊擊移駐鎮沅與知府
同城以千總一員把總一員外委千把二員兵三百名隨

遊擊駐劄以把總一員外委把總一員帶兵一百名駐防
恩樂內抽撥三十名令外委把總帶領分駐三家坡防守
以把總一員外委把總一員帶兵一百名駐防新撫內以
隊目一名帶兵十名於界牌安哨稽查其威遠地方以左
營守備一員把總一員外委把總一員帶兵二百五十名
駐防內以把總一員帶兵一百名分防抱母井其左營原
貼防攸樂兵丁一百五十名令千總一員外委千總一員
帶領隨總兵駐劄普城又右營原駐攸樂今擬撤歸思茅
應令遊擊一員千總二員把總二員外委千把四員帶兵

滇粵
五百名駐劄思茅查猛旺一汛距思茅二百里若原有攸
樂一營自宜於此處設汛以聯聲勢今攸樂既撤則猛旺
亦可不必設兵惟由普藤猛旺茶山直抵九龍江一路飭
令各土弁沿途按站設立土塘遞送公文又班鳩坂係思
普咽喉應撥把總一員外委把總一員帶兵一百名駐劄
班鳩坂保固道路此外尚餘兵三百名令右營守備並把
總一員外委千總一員帶領隨總兵駐劄普城統計總兵
帶遊擊一員守備一員千總三員把總四員外委六員馬
步兵一千一百名駐劄普城則官員兵丁力量充足無事

可以壯聲威有事可以供調遣仍令各營汛備弁每月撥
兵五十名於連界各路彼此會哨一次換旗巡防不許騷
擾多事庶營勢謹嚴兵力整齊可以緩急足恃矣

一普洱地方遼闊宜慎選土弁管束以專責成也民人錯居
皆有鄉保約束夷獮雜處務須土目稽察內地之土目必
當削其事權而邊境之土目又必使有專責查江外各猛
地方已有宣慰司刀紹文及土弁刀細悶納保守以爲藩
籬雍正十年逆夷蠢動江內江外到處煽惑是時刀紹文
年尚幼穉未經承襲紹文之母刀氏同土弁刀細悶納力

拒妖言率衆堵勦辦理糧運保固江防實屬深明大義懋著勤勞仰懇

聖恩應否比照烏蒙案內隴慶侯之庶母二祿氏四川沙罵土司沙氏之例給與封典並賞給刀細悶納土守備職銜以昭獎勵至江內之六版納及茶山整董烏得白馬山六困一帶幅員遼闊山深箐大且烟瘴甚盛旣不能處處設兵在在置官若不令土目分管漫無責成地方難以甯謐今通盤籌畫除猛烏易武小猛養舊有土弁召匾乍虎叭干無容另議外查普藤土千總刀猛北深明大義始終效順

隨師搜勦歷著勤勞應賞以土守備職銜將猛旺及糯竜等二十四村寨責令管理其茶山倚邦一帶均係窩泥查有倚邦土弁曹當齋爲人誠實隨師勦賊勤勞素著應將倚邦茶山責令管轄整董亦屬扼要之區自土弁召第於叛案內拿解地方無人鈐束查有土目召音隨師奮勇甚屬出力應給土把總職銜管理整董再猛腊地處極邊與外域接壤最爲緊要彼地頭人召糯極力堵禦辦運軍糧甚屬急公効順應賞給土千總職銜以示獎勵責令保守邊境至白馬山六困整控一帶原係土弁刀輔國管理查

海製
伊兄刀興國不法律應連坐但興國謀叛輔國實不知情
一聞蠢動即報思茅文武協同守城又著伊妻防護倉糧
以資兵食後經發往効力贖罪輔國奮不顧身實心出力
擒獲賊首並將白馬山一帶夷民全數招安甚有功績應
賞還土千總職銜仍令管理地方必能格外感恩以圖報
効再攸樂營汛既撤其三十六寨需人管約據宣慰司刀
紹文及各土弁公保以童損管理窩泥寨喇鮮區分管蒲
蠻寨俱皆誠實可用宜令管理其餘以日火頭俱擇勤慎
老實者分派充應仍不時嚴加稽察果能實心効力自當

酌加獎賞如有多事滋擾即當拿究另行更換此並非以
久經歸流之地而反責成土目蓋地方總係流官管轄土
目不過分查地方惟以土目管土人仍以流官管土目庶
窮山僻壤瘴癘險阻之區莫不各有責成各有約束地方
文武止須提綱挈領彈壓撫綏則事不煩而民不擾似亦
治理邊夷之要道也

一普洱府治宜改建石城也普郡地處極邊接壤外域實中
外之咽喉滇南之門戶既設鎮府必資城郭現在雖有土
城一座但土性浮鬆一經淋雨易於傾塌殊非久遠鞏固

之計且易啟蠢類覬覦之心應請改造石城方足建威消
萌其思茅土城應再修葺堅固並於四面添築砲臺鎮沅
城垣亦日久圯塌應一併修築則捍禦有資邊疆永賴矣
一官員販賣私茶兵役入山擾累之弊宜嚴定處分也思茅
茶山地方瘠薄不產米穀夷人窮苦惟藉茶葉養生無如
文武各員每歲二三月閒即差兵役入山採取任意作踐
短價強買四處販賣濫派人夫沿途運送是小民養命之
源竟成官員兵役射利之藪夷民甚爲受累前經陞任督
臣鄂爾泰

題明禁止兵役不許入山臣等又將官販私茶嚴行查禁但
不嚴定處分弊累不能永除請嗣後責成思茅文武互相
稽查如有官員販茶圖利以及兵役入山滋擾者許彼此
據實稟報如有徇隱一經察出除本員及兵役嚴參治罪
外並將徇隱之同城文武及失察之總兵知府照苗疆文
武互相稽查例分別議處庶官員兵役不敢奪夷人之利
而窮黎得以安生矣

一攸樂一帶之鹽課宜寬免也查磨者烏得整董猛烏四鹽
井皆在極邊瘴癘之鄉與普洱府治相隔甚遠春夏水發

味淡惟秋冬可以煎鹽爲數有限附近山多箐密夷人罕
事耕種專藉此鹽零星買賣米資生雍正七年間於箐
畫普洱建置事宜案內

題請添設大使二員駐劄猛烏整董督煎辦課仍以瘴盛不
能往井將大使裁撤令夷人認課銀二千兩自夷人認課
之後獲利輕微生計不贍雍正十年間逆夷叛擾塞井毀
竈附近諸夷奔逃四散井地一空是以雍正十年十一年
分課銀無出經撫臣張允隨會

題請免現據鹽道張無咎具詳設法招徠尚在畏懼不前無

人煎辦臣思課額虛懸總於

國帑無益錢糧有限不如恤惠窮夷仰懇

聖恩將原定認納課銀特賜豁免仍賞夷人煎售庶各安心復
業而兵火之餘得以生計有賴矣

一就近歸併村寨以便管轄也地方界限最宜劃清若隔裂
寫遠勢必稽察難周如元屬善政里猪山者鬼布林腊猛
三鄉及上下猛緬猛松左戛又惠遠里之磨鋪薩等糯那
阿扇那補怕南害等寨地近普攸距元十站二十站不等
相隔遙遠難以管轄應將前項村寨歸併普洱管轄仍選

委土弁目就近分管又查元屬惠遠里之西薩猛列地方
離元江五百餘里去威遠甚近應改屬威遠管轄又有鎮
沅府屬之壩朗壩木壩癡三寨去鎮沅九站去元城止二
百里應割歸元江管轄不但稽察甚便卽一切上納錢糧
充應夫役不致有遠路奔走之苦矣

一威遠宜歸鎮沅管轄也查鎮沅一府戶口無多止轄恩樂
一縣事務簡少威遠附近鎮沅向設同知一員經歷一員
不隸府轄聲勢殊不聯絡應將威遠地方改歸鎮沅府管
轄原設之同知改作鎮沅府分防威遠撫夷清餉同知一

切刑名錢穀事務照大關同知之例仍令辦理由府稽察
核轉換給關防以昭信守其原設經歷一員應行裁去改
作鎮沅府知事一員仍隨同知駐劄威遠以供任使一應
養廉役食衙署等項俱應仍舊毋庸增減其威遠生童向
附元江府學今威遠既議改歸鎮沅應將附入元江府之
生員歸入鎮沅府學嗣後生童俱歸入鎮沅府學考試以
廣造就再鎮沅府屬之新撫地方爲元普咽喉自恩樂至
普洱中隔六站運糧解犯往來必經必需專員料理應請
設新撫司巡檢一員鑄給印記駐劄新撫稽察逃盜賭博

海製
專司巡緝及往來運解事務庶佐理統轄各有責成治理
得收實效矣

一元江營制宜酌量增改也查元江四面夷疆幅員遼闊實
屬居中扼要之所從前設遊擊一員兵丁八百名營制單
弱汛地零星難資控制茲當地方大定之後自應亟爲籌
畫以期永固邊圉請將該營遊擊裁去改設參將一員添
設守備一員把總二員兵丁四百名拔外委把總二員同
原設之守備一員千把總六員外委千把總六員兵丁八
百名分爲左右二軍仍隸臨元鎮兼轄其參將一員帶充

軍守備一員把總二員外委千把三員兵丁五百名駐劄
元江府城防守彈壓分佈塘卡他郎地方乃元普鎮威通
衢實屬要區原經建城設汛但汛兵單弱今應以右軍守
備一員帶把總一員外委把總二員兵丁三百名與他郎
通判同城駐劄又阿墨江口乃元普咽喉應以把總一員
帶兵五十名防守渡口與他郎通關哨相爲連絡又因遠
地方甚爲扼要應以外委千總一員帶兵五十名防守與
他郎大汛相爲犄角又邦轟一汛路通元新應以千總一
員外委把總一員帶兵一百名防守內以外委把總一員

帶兵三十名分防谷麻江渡口又老烏山爲元新等處出入要隘應以把總一員帶兵五十名駐防內以隊目一名帶兵十名輪流更換稽察南戛渡口又馬鹿塘乃省會咽喉爲揚武壩青龍廠適中之地應以把總一員帶兵五十名防守又永豐里之豬街地方四面通達甚屬緊要應以千總一員外委把總一員帶兵一百名防守並令不時酌撥兵丁於壩罕一帶遊巡稽察其各汛應設塘卡各令照界安設仍令各照地界按期遊巡會哨則佈置謹嚴聲勢連絡庶無零星單弱之虞其原設之土戛汛瘴癘甚盛難

以駐兵界牌新寨歸普洱鎮設汛防守白土坎相去豬街不遠壩罕汛亦與豬街連絡磨沙河與老烏山聲息相通均毋庸設汛又元城長互臨江無險可恃應於東南各築砲臺一座西北各築砲臺二座以施鎗砲其他郎城已新築砲臺素無大砲查於敬獻芻言等事案內業將省城存局得勝發貢大砲酌撥八位分發元江今應令存貯元城四位分貯他郎四位庶資守禦

一新平官兵防汛亦宜增改以資彈壓也新平一縣界在萬山內控魯魁外連哀牢地廣兵單夷獠兇悍最爲緊要查

新營原設參將一員守備一員千總二員把總四員外
委千總二員外委把總四員兵丁一千名實屬不敷且存
城兵丁僅止一百八十餘名更爲單薄應酌添兵丁二百
名把總二員同原設把總分爲頭二三司並照拔外委把
總二員仍隸臨元鎮兼轄以參將一員帶守備一員把總
二員兵丁四百名駐劄縣城居中彈壓其縣屬之腳底母
地方爲元新門戶野賊出沒之所應以把總一員帶兵五
十名駐劄與元新各汛彼此連絡又舍壘龍一汛在哀牢
半山甚爲緊要應撥把總一員帶兵丁一百名駐劄防守

又錯納賈一汛向係猓賊出沒小徑應撥外委把總一員
帶兵五十名駐劄又漫干壩一汛爲恩樂太和廠斗門鄉
出入門戶且與從前各猓賊舊巢緊接實屬要區應撥千
總一員外委把總一員兵丁一百五十名駐劄防守內撥
兵丁三十名以隊目帶領前往太和廠分防巡哨以衛廠
民又舊哈一汛居哀牢要區且與楚姚之界牌汛相爲表
裏應撥把總一員外委把總一員帶兵一百名防守又揚
武壩一汛駐劄魯魁山底甚爲緊要應撥兵一百名令把
總一員外委把總一員帶領防守又魯戛縣城原設千總

海東
一員外委千總一員帶兵一百名防守今應照舊又塔龍
一汛接壤丁癸二鄉並易門之馬頭等處最是藏奸應撥
外委把總一員帶兵五十名駐防又化念一汛係新平魯
魁門戶應撥外委千總一員帶兵五十名防守又俄爽一
區爲魯魁出入小徑與臨安石屏河西曲江等處相通地
旣偏僻又無營汛故從前野賊得以任意往來應撥外委
把總一員帶兵五十名駐劄堵截其原設之新化州樹哺
拉灑冲亞泥壩黑泥哨歇塔圖等汛均可不設庶汛地皆
居扼要足資防禦而亦無零星單弱之虞矣

一元新土目宜禁止擅管地方以杜擾累也查元江新平均
屬內地凡稽察村寨約束夷戶俱應地方官自行經理非
同普洱邊方僻遠必須設立土目以資稽察乃元新村寨
向被各土目私行霸佔有某處屬某土目項下名色分疆
劃界竟成世業以致不法土目科派索保持強欺弱無所
不至夷民畏其威勢莫不羣聽指使有呼輒應及前歲野
賊猖肆各土目項下之人又多附和隨從彼此推委不能
約束若不亟爲清理不特夷民世受苦累兼恐因循日久
漸難鉗制應嚴禁各土備弁目以後不許霸佔村寨一切

稽察約束事務俱令地方官管理不許仍存某人項下名
色各村寨原有火頭卽如內地鄉保應令文武地方官會
同查明務擇誠實守法者充當應更換者更換其土備弁
目只令聽候地方官差遣調用不許向各村寨一毫滋擾
如各土備弁目仍有霸佔村寨擅行索保私養後生仇殺
生事及匿藏盜賊玩法爲匪者卽嚴拏正法地方官徇縱
失察

題參議處如各土備弁目果能安分守法毫不多事差遣無
悞盡心効力者於年底令地方官核實具報分別獎賞庶

夷民得安耕鑿永沐

國家休養生息之宏仁而土目削其事權亦免尾大不掉之
後慮矣再元江府城原設漢捕六名此輩需索滋擾實屬
股民之蠹應行裁革以靖地方

一調用鄉練宜用文武印牌也查土練皆係百姓並非土目
私人非奉官調不應擅動歷年調用土練大抵土目自傳
木刻者俱多行之日久恐真僞不分姦徒易於鼓惑應請
嗣後調練務以地方文武會銜印牌爲憑不許土目擅自
私調並通行曉諭大小村寨鄉管頭人如有土目不奉印

牌以木刻小票擅調鄉練卽赴文武衙門具報以憑嚴拿
照擅調官軍律治罪如鄉管火頭通同隱匿一併究處地
方文武失於覺察並行參究則士弁目無權可操實屬防
範之要道也

一臨安府屬石屏州之寶秀地方宜築土城以資捍衛也寶
秀界連元新爲臨屬咽喉裸賊出沒要區前歲逆夷悖叛
先遣蹂躪應於寶秀築土城一座於扼要之處設立砲臺
撥給砲位以資守禦又寶秀向於臨元鎮標撥把總一員
帶兵五十名駐劄未免單弱應於該鎮標內添撥兵五十

名共一百名令千總一員外委一員帶領駐防則寶秀可
獲安堵卽臨安石屏亦皆資捍禦矣

一防汛要地宜籌捍衛也查普思元新形勢遼濶設汛之處
大抵離城寫遠地居扼要若止撥兵駐劄而不設險防範
猝遇有警汛兵多者百餘少者數十不比大營究屬單弱
難以守禦應於現議設汛處所擇其尤關緊要者或築土
堡或建木城汛兵駐劄其內庶防守有資賊人不敢覬覦
其各塘汛弁兵應近則按季一換遠則半年一換以免攜
帶眷口之累且勞逸得均可以輪流操演至增兵設汛各

處均宜建造衙署營房以供棲止統俟委員同前議應建
應修城垣砲臺一併確勘估計詳核另

題

以上一十六條就臣等愚昧之見斟酌調劑以副我

皇上慎重邊疆奠安黎庶之至意其普洱一鎮元江新昭兩營
現添兵丁共九百名應照馬一步九添設但各標鎮協營
額兵均難抽撥而悉行招募又多糜費臣等悉心籌酌查
滇省督臣衙門向有隨丁名糧一百分撫臣衙門向有隨

丁名糧八十分經前督臣鄂

奏明在案今軍務全竣賞費無多臣等養廉儘足敷用應按

照營制將臣標隨丁內撥出馬二步八兵餉一百分撫臣

親標隨丁內撥出馬一步九兵餉八十分以充普洱等處

新添兵餉又查雲南奇兵營原設馬兵一百八十名步兵

四百八十名守兵三百四十名與滇省各營馬一步九之

制不符且滇省跬步皆山無需多用馬匹應將奇兵營照

例改作馬一步四守五營制其減出餉乾銀兩亦撥作新

添兵餉是雖有減撥之名營伍仍係充實錢糧又可節省

其餘不足之數另行招添合併陳明是否有當臣謹會同

雲南巡撫_臣張允隨雲南提督_臣蔡成貴合詞具

題伏乞

皇上睿鑒勅部議覆施行

師範曰章疏之關於國計民生豈淺哉不徒以文以其理不徒以理以其事漢之董江都晁家令唐之李贊皇陸敬輿宋之范希文李伯紀明之王伯安張太岳尚矣今繫中所采籌國裕民無不抗迹古人他如楊文定之條陳事宜傅文忠之奏止征緬阿文成之議停駐防其為功于滇者皆炳炳在人耳目云

嘉慶戊辰春三月記于皖城之天甯寺

檀萃禦賊議

方今之患營空倉空庫空然轉其空而實之蓋有道存焉奸匪之徒矚此三空恣行搶劫所過村寨居民奔逃無敢堵禦之者使所過一處即空一處不早為之所其空益深事不可為蓋三空之患猶恃有民固其民不至於奔逃使之各自為守在於檄行州縣申明保甲團集鄉勇凡民之逃先生於畏賊一人逃羣從而逃棄其家室老幼畜積賊得據之以恣其擄掠淫殺故賊愈張而愈多遂至於不可制今固結居民民有所恃不至於畏賊各顧其室家老幼

蓄積齊力出而禦賊賊聞之必不敢來攻蓋攻難於守城
堡之守以高臨下村寨之守以逸待勞故守者之一可以
敵攻者之百凡城池以官吏領之以士民佐之村寨以士
民之有身家智略者領之各率其子弟年少豪勇以佐之
賊必不敢入故申保甲集鄉勇得寓兵於農守望相助之
還意不假力於營不待饟於倉不仰給於庫各自爲守不
仰於官而賊不能擾轉其空而實之此不易之道也此事
之行或疑其驚惶百姓夫百姓驚惶由於無所倚恃故聞
賊卽驚賊至卽逃今使四鄉之民各恃其村堡都會市井

之民各恃其城郭關廂不畏賊而怒賊且同心共憤以攻
賊正所以安集百姓使其有定心也固民卽能任地任地
卽能生財此相因之道也民心旣固不至奔逃耕於野爲
農民聚於堡爲鄉勇則民皆兵也民不散而地不荒耕種
如故而糧有自出是倉不空也丁地之銀廠鹽之額舉皆
如舊是庫不空也去三害而獲三利出一紙通行文書可
以收實效矣蓋爲政之道憲府總其大州縣任其成故地
方有事責成於州縣州縣雖曰親民亦不能以一身獨爲
也必分之士民書役鄉保以其襄其成夫獲一案有賞失

一盜有罰處分皆歸於州縣故州縣莫不盡力竊強黨少則曰盜奸匪成羣則曰賊然總之皆盜也責成於州縣非難辦者也漢時渤海賊起龔遂爲守單車到官賊卽解散牂牁叛殺太守朝議棄之杜欽說王鳳遣任職太守往於是陳立爲守卽便誅平古來如此比者甚多故成功多由於守令凡夷民之變宜選州縣夙有威望爲夷民所信服者鎮撫之庶幾收龔遂陳立之效亦一策也至於守禦之備細謹陳數條於左

計開

- 一檄行府廳州縣轉行民間申明保甲團集鄉勇保護村寨使村寨百姓各有所恃不致驚慌逃走此第一上着
- 一村寨隨其大小各推士民爲長各率丁壯爲鄉勇一切耕作生理仍照其常有警則團集守禦其守禦有效則計功獎賞着地方官詳明或給頂帶或給匾額以示鼓勵
- 一守禦器具須簡便易辦半兼乎農器耨鋤棘矜皆足以爲守禦之資鋤鋤刀斧之類農家所盡有者去短柄用長柄卽可以守禦去長柄用短柄仍爲農器日本國兵以長竹竿着小斧頭如牆而進鋒銳莫當鄱饒之民械鬪以長貓

竹削其稍入桐油鍋煮之比鎗刀更利鳳穎間械鬪用齊
眉棍先以炒石灰裝入鴨蛋殼人懷一枚就敵先拋蛋殼
烟霧迷空然後用棍進擊先據上風拋蛋無不勝者又用
長竹竿紫深刺把於竿頭謂之狼牙筧亦輕便可使此皆
不大費錢而易辦者也尤莫便於飛石卽童子飛墮礫之
戲手臂之勁能打數丈高且遠至百步二百步古老相傳
楊林未裁併時尙爲縣有賊至民皆搬避令某止之曰避
非計也丁壯能走矣老弱能盡攜之走乎男能走矣婦女
能盡隨之走乎銀鈔能帶而走矣穀米牲畜一切能盡帶

以走乎與其盡遺於盜至於出無所依歸無所宅終不免
於死曷若同心致死以禦賊賊退而家室可完吾當率先
爲汝禦乃教其民用飛石之法每五百人爲一排飛石子
擊之賊驚以爲天下神石也遂逃遁論功陞布政此法尤
便之至於早晚閑空時練而習之以當戲具尤少年所不
厭者

一村寨各居民門口宜築矮牆狹巷僅容一人進出明正德
間山東盜起許忠節公達爲某縣用此法教其民但以一
人持短刀守之門盡開而賊不敢入村村皆然賊無所利

奔他縣擄掠公以功陞副使此皆先事預防且易爲辦者也卽守城之法先於水邊路口多築牛馬牆防其衝突毋使近城而城外之關廂街市可保蓋防守之道遠先在於四鄰近則在於四境至於入境已大張皇至於薄城喪失尤不可計矣許公令民沿門築牆蓋亦守城之法變化用之者也

一守禦城池其法亦如村寨而尤易爲力大府州縣居戶百萬數十萬十萬卽次而中下且數萬卽小而至極亦敵一村寨且數百戶戶出一人禦賊已爲數不可紀極爲地方

官者但使其團聚不至於離散則保境禦盜原所不難上年設炒麵廠之法甚善官不費而大濟於民艱則知此地矜士父兄之可與有爲在上官有以獎勵之者仍照前法以爲團練守禦之備當無不樂從者矣

一駟路衝塗自板橋起至亦資孔止除依城池爲固者不計外其去城池遠者亦申保甲團練之法其中間馳道兩頭有關廂口口外築牛馬牆其兩旁民居客居後戶之外各築牆連接包裹之以爲固其餘皆如防守村寨法

一民自爲守貧富不同量貧富各出資力以保障鄉邦不至

於失散其爲功德至大而自巳之身家藉衆力以保護不
至全爲拋棄而賈盜糧爲巳爲人交受其利是在互相勸
諭耳

一此事督率在地方官有功奏陞加銜其失陷村寨計過照
例治罪

檀萃守禦後議

鄉勇者民兵也異於官兵官兵廩於官其添設良難民兵
因其民其團之最易故行之於古而效行之於今而亦效
者良以其易也唐馬燧鎮太原募廩設教之戰數月

遂成精卒居一年廣場羅兵數萬威震北方李抱貞鎮澤
潞二丁編一蠲其租徭給之弓矢三年皆爲精兵二萬不
廩於官庫實兵雄爲諸軍冠李德裕帥蜀立雄邊子弟總
十一軍威聲震於西南此皆承衰弱困敝蹂躪之後棘手
難爲而轉弱爲強曾不旋踵惟取諸其鄉以本地之民守
本地之險故見功易易耳然猶須募練也其不待募練者
莫如民自相與爲兵南唐淮北與周接壤世宗侵唐已舉
江北而小民相與聚山頭立堡壁以農器爲兵以楮爲甲
周師屢爲所敗唐地多爲所復當時謂之白甲軍豈待上

之募練乎宋之河北西路被邊州軍百姓自相團結爲弓箭社不論家業高下戶出一人帶弓而鉏佩劍而樵出入山阪飲食長技與敵國同私立賞罰嚴於官府分番巡邏舖屋相望有警擊鼓立致千人器甲鞍馬常若寇至蓋顧親戚墳墓人自爲戰敵深畏之况盜賊烏合乎故羅大經論民兵之利謂張魏公帥川陝令挑選強壯以知縣爲軍正尉爲軍副不半月得兵二十萬陳福公獻民兵之策兩淮已用其法荆襄尤有成規開禧用兵禁旅多敗兩淮山寨萬弩手率有功丙寅敵圍安襄分諸郡兵與湖北義勇

往救兵潰鈔畧甚於寇戎而義勇隨帥進退不犯秋毫蓋顧其室家門戶也故民兵勝於官兵此皆行之古而效者也其行之今而效者是則湖北孝感之用鄉勇乎牛生會誠歸言往來由孝感其鄉人沈君琦上年署孝感聞寇警大修城集鄉勇賊至營於胡家寨衆二三萬鄉勇僅五千禦賊賊不敢出會官兵二千至共擊之賊盡殲他賊聞之盡避於西不復東上自安陸德安下暨黃州數郡安堵無虞自是漢口武昌皆效孝感漢口有鄉勇三千武昌有鄉勇五千皆恃以無恐襄河船帮亦有鄉勇卽以水手充之

生於臘底到沈公署住二十日親見士民感戴衆志成城
屹然金湯之固行至漢口街衢熱鬧如故武昌亦自帖然
又言掃滅胡家寨賊無一賊得脫僅遺婦女弱口收禁至
今捷聞時官兵猶有殺傷鄉勇竟斲折損鄉約保正各領
所統之鄉勇所執器仗惟刀與長鏢衣掛刺鄉勇字皆自
備不煩於官官但鼓舞獎勵之卽大收其用故論功賜以
頂帶某馬牌子力戰加之六品銜所以人心踴躍爭爲出
力今若照孝感已行之例只在傳集紳士耆老四鄉之頭
人面加獎諭多出告示以鼓勵之當無不濟者矣沈公在

孝感甚得民心事平後新令至民不受以爲吾公全吾城
保數萬生靈苟去吾公吾等卽爲之死寃莫之敢奪仍視
事率常又念吾公清苦競賙之雖萊傭線媪亦日有投是
知州縣之吏能清廉卽得民民其爲守禦上官不能以勢
奪而已亦不至於獨貧此皆事之可風者某家皖黃間感
沈公之保障一方遏絕教匪不致蔓延於江北淮南數千
里之地其功至大而吾家鄉之受賜尤深故表明其事共
率此行之使知其成事易而見功速耳爲三空之患故議
團集鄉勇官不費而事易行若出於召募費空難以爲給

必中止然鄉勇非但應急卽無事時亦須備也再商行之
以爲何如乘此民心踴躍之際而終行之百世之利也
以平易近情之論立擲撲不破之法誰謂篤學人不嫻
經濟○沈君昆明人中辛卯鄉試與予善賊旣平飭回
安陸本任抑鬱以終旅櫬畱楚者數年近始變產迎歸
宦局如此能不令人一嘆

江澹源條陳稽查所屬夷地事宜議

某皖上凡材知識淺陋驟膺繁劇諸多未諳自初夏履任
以來舉凡察吏安民撫馭邊夷各款要日惴惴講求咨議

惟恐勉副職守之未能竊查臨安爲滇南要郡幅員遼濶
與交趾南掌爲隣所轄十土司十五掌寨計其文報程期
遠距郡城動需五六日及旬餘而後至其與外隅毗連之
地瘴氛淫毒夷種叢多而三猛尤爲極邊隘渡汎塘最關
緊要雖一切防禦事宜具遵舊章辦理邇皆畏威懷德甯
謐無虞惟是諸夷好貪小利不善謀生歷年內地民人貿
易往來紛如梭織而楚粵蜀黔之攜眷世居其地租墾營
生者幾十之三四每有狡詐剽悍之徒始或認種田畝並
借販賣茶布針線爲端希覲盤踞繼則夷情旣熟輒敢多

方煽誘恣其把持甚至窩引匪人肆竊攘奪構釀案牽累無辜而若輩仍得隱匿姓名置身事外鬼蜮伎倆固結不搖此等漢奸實為夷方之蠹某諸訪既確亟當設法清其源本嚴行查辦至如土司掌寨世襲其職巡防控制馭責有專成務在遵守夷規嚴肅外防廓清內境庶使村落各安生業藉以保其土地傳及子孫茲不揣冒昧謹就管窺所及謬擬數條具呈另摺是否可採伏祈衡奪飭遵再事關查禁夷地新定章程倘蒙允准施行若僅由某奉批示禁恐習玩已久遠難必其遵從仍懇徑頒禁令通飭曉諭

俾各民夷咸知令在必行益加感悚不敢玩違實為公便謹議如左

一臨安土司掌寨地方凡內地民人挈家久處租種為生者宜設立甲總嚴行稽查也查此等民人落業夷寨畜妻生子丁口漸繁遠欲逐戶押遷勢既不行情亦未順然若輩連村聚族性匪馴良其計謀較勝於夷愚其徒眾每聯為漢黨視放債盤剝占奪財產之事藐若故常或復誘使作奸犯科供其巧攫而外來面生可疑及為匪滋事之人浸尋混跡其中憑恃鄉井之親獲資棲託逗遛勾結牽制平

民至受累難堪卽不幸往往有事應請仿照編排保甲之例凡屬內地攜眷安家者夷已久之戶責成各土司掌寨每村寨市店挨戶清查十家設一甲頭十甲頭設一客總概以夷人之樸直曉事者爲之着落編次客戶姓名籍貫給與門牌註明年齒男丁女口若干係於何年月日搬住該處現在作何生理逐戶開造成冊不得遺漏名口由該管土司掌寨呈報府縣存檔倘有盤剝誘唆不法等事許甲頭同附近環居人等舉報客總確查屬實卽轉報土司掌寨拏解府縣究治並將家口遞籍不許仍畱在彼爲累

夷民其面生可疑之人嚴查驅逐毋得姑容至查有肆竊滋擾各弊立卽報明土司掌寨并將窩留之戶拏送究辦若村隣互相容隱卽干連坐甲頭客總徇縱一併治罪一內地民人本不得擅入夷境凡往來營貿并仍前攜眷覓住以及遊棍潛入生端者宜設立隘卡嚴行盤詰也查臨安土司掌寨內隸版圖歷有年所客商絡繹習以爲常原難杜其謀生之路而近日攜帶家口之輩次第繁多夷寨地方漸已艱窘加以漢奸投入朋比戕虐轉成反客爲主之形鳩居鵲巢牢不可破聞之焦爛救火不如曲突徙薪

言治於已事難爲功防於未事易爲力竊照各土司掌寨均有扼要隘口向因內地赴彼貿易每多挈族而行日久相沿疎於盤詰遂致遊蕩匪棍混入爲非應請頒示責成各土司掌寨於管轄扼要諸隘口各另派妥實目練五名官給循環印簿二本常川在口稽查凡入夷營貿易諸人悉令報明籍貫姓名同行幾人販何貨物計若干馱擔往何處販賣於某月日經過某關隘出人一體分晰登填不得稍有遺漏按月將印簿送府查核循去環來接續無間遇有攜帶家口入夷覓住之人概行禁止至於形踪詭譎

隻身無業或三五成羣藏帶器械並藉稱係本管府縣差役營汛兵丁查無印票執照以及各處游牌不由所過州縣掛號者卽均屬多事游棍務須加意究詰拏解嚴懲均不得任其混入夷地其實係買販人等驗明放行亦毋得任意留難仍飭令土司掌寨着落分管村寨目練伙頭時刻巡查視其貿易貨物多寡限以時日催令出境不許久棲如有未經登簿匪徒潛入滋事別經拿獲究出是何處疎虞卽分別枷責若各汛卡隘口有能盤獲匪徒送官者無論弁兵土日均酌量獎賞以示鼓勵

一夷衆與內地民人聯結婚姻宜令分別嚴禁杜絕盤踞也
查客民經商投向夷地挈家而往者漸次已繁更有本屬
單子之身挾貲潛入初惟倚漢奸在彼代爲營謀已而愚
夷墮其術中取便一時至與聯爲婚姻妻以子女因而憑
藉夷婦往來村寨行放錢債滾剥多方是若輩始則以漢
民倚恃漢奸張其聲援之助繼且以夷婦交通夷衆逞其
刻削之私攘取財貨由於此準折土田由於此鳩聚滋
多鴟張滋甚日復一日查禁彌難某前條所陳雖於入夷
貿易人等請飭限之時日催令出境不許久棲正恐夷民

無知誤爲若輩籠絡轉得藉有新立家室碍於驅除是亦
急宜預爲之防嚴行禁止應請嗣後除內民久居夷地已
有眷口落業成家者毋庸置議外其有隻身竄處希覬侵
踞之人嚴飭各土司掌寨遍張曉諭無論是何種夷衆概
不許受其愚弄擅以婦女給配爲婚並派令分管村寨目
練伙頭挨戶嚴查如仍徂前習卽以違禁之罪罪之則若
輩單隻孤棲無所留戀舊居之鄉并轉深慕思清肅夷方
庶幾有賴

一三猛地方緊接安南南掌夷界宜慎密巡防嚴禁出入也

滇輟系
查臨屬有猛賴猛喇猛梭猛蚌猛丁猛弄號稱六猛而賴喇梭三猛尤關緊要其外夷進入三猛要口有禮社江一道於乾隆五十年奉前制憲奏撤那黃渡等處弁兵移於禮社江之斗母閣及下游大石硎兩地安設汎卡常川駐劄並資巡防其藤條江之那黃渡金子河曲嘴橋及三猛緊連黑江各渡口着各土司暨各掌寨設立日練時刻防守並責成稿吾卡土弁龍瑄帶領日練協同各掌寨梭巡稽查不許外境民人潛入滋事亦嚴禁內地民人擅出生端現在俱屬甯謐第恐日久生玩弛於周防應仍請申飭

土司土弁掌寨嚴密盤詰毋容久而疎懈或生囂張擾害之虞更立定期每月將巡查情形稟府一次核其勤惰分別勸懲卑府仍按季通稟鑒察以昭慎重其內地民人久經寄猛居住各戶及赴猛貿易之人悉照前條所陳實力辦理以歸畫一

一土司掌寨所轄土夷漸習滋訟宜令嚴究主唆斷截根株也查各處土夷種類不一習俗各殊內附

皇輿向化有日其安居樂業者固多而桀驁狡悍之徒亦時有自內地民人熟知其蠢頑之性從而潛為勾引教誘詞訟

亦已漸起刁風兼之土夷不通文理凡控爭事件無不倚仗漢奸代作詞狀聽從主行而漢奸視爲奇貨可居不論情節曲直事之重輕惟知構隙交攻暗圖漁利迨至虛誣者身攬罪譴主唆者竟得蕭然事外苟且自完竊惟杜絕訟累雖內地亦例嚴主唆使其行之夷方更爲法所難宥應請嚴飭土司掌寨於夷民訴訟戶婚田土務須細心分割將情虛理曲者窮詰其主意係何人所出詞狀係何人所爲在不通文理之愚夷本不難於跟究一經據實供吐果係出自漢奸凡在土司地方者輕則隨案懲責立即

除重則解交有司究治主唆之罪其在各掌寨地方者拏送該管州縣分別遞籍嚴辦務令有犯必懲概不得任其飾詞狡卸姑予從寬庶可杜訟端而安夷衆

一土司掌寨字識委任經管夷務宜令慎選其人兼立法考察也查夷人不識漢字一切交查事件文稟不得不聽其招募內地民人充當字識現在各處字識循分守法克盡其職者曾無幾人多有罔知顧忌之徒營幹土館號爲主文一經遂其夤緣竟爾恣意把持舞文滋弊竊檢查舊卷每見土司掌寨控爭龔替及苛刻夷民各案無非該字識

於中煽惑播誘致釀釁端甚至土司掌寨甘爲所愚蕩產傾家襲職難守而若輩陰助其惡明搜其財爲害夷方所關匪細應請飭土司掌寨務須選募誠實曉事之人承充字識將姓名籍貫開報府縣立案如查有玩法弄獎之處卽案例從嚴究辦庶可清夷署而肅吏規

公守臨安日重學校正祀典雅懷清節歸後人愈思之此議純實嚴密不減王伯安贛南諸扎諭

檀萃廠記

甯臺蘆塘水洩洞銅廠俱在順甯東木龍里介乎瀾滄黑

惠之間三廠相距不過數十里然因山勢之一上一下計之其里數有然若自巔平視相距不過數里蘆塘爲稍遠距郡三百五十里在東木龍里七甲有蘆塘寨甯臺較近距郡三百里有東木龍村大廠村小廠村水洩洞又近距府二百五十里甯臺開自乾隆六年甯臺衰而十三年開蘆塘十九年開水洩俱爲甯臺之子廠子實母虛全歸於蘆塘而甯臺之名卒不易然木里銅廠在瀾滄江北之曠音里木里箐與三廠隔江相望而辦銅較少考前志不過曰歲可辦銅二十萬二十四萬三十四萬而已其後滇南

各廠俱衰所資以充京運與各省採買盡歸於東川順甯
順甯額增遂至二百九十萬而又於正額之外加辦百萬
其盛如此以辦廠著名者東川則蕭君文言順甯則曹君
湛皆因辦銅功一進東川守一進順甯同知大府倚之如
左右手謂之蕭曹曹爲天長人蕭爲江都人曹有幹畧曾
令昆明稱能治後以縣令辦廠勢漸張張未幾旋沒於廠
累及妻子幾不能歸蕭之盛先曹曹沒十餘年而蕭仍如
故近始劾罷而移永昌守屠君於東川接辦則乙卯春也
今辦甯臺久以司馬攝順甯令兼管廠事則宜春甘土穀

稼田由拔貢生判騰越西道楊以浚請於大府俾管甯臺
廠廠復旺以功改令且晉同知本文士愛吟詠其在廠多
興剏有亭臺池館林木花卉魚鳥遊覽之勝標八景而系
以詩又謂此廠寶臺山牌樓山楊柳灣鴛鴦塘桃花箐大
河橋老鷹坡獅山象山謝家村蘆塘村著名者不能悉紀
又礪砂砂丁礪戶廠街炭戶馬脚油米等皆廠之要務不
可不知故爲甯臺雜韻二十首以貽後之司此廠者有所
考核可以一洗銅臭矣

湧金廠者故爲立思基銀廠也立思基爲峒度吾里第四

甲地在郡之西南而甯臺在郡東北相距五六程其廠舊矣而衰微甚課猶不足於供有自邕東來者謂羅漢形向之誤者鑿其背宜不得堂乃轉而破其腹而堂見銀之出不貲管甯臺者曹君也遣人問訊而立思基廠歸縣縣家人怙其廠不禮於甯臺之使使怒歸告於曹曹亦怒念有以報之會李節相巡邊邕西曹乃往見之言銀廠開人趨辦銀而銅廠必無人銅必大缺爲此語以劫持幸封其廠以洩忿然李雖陽然其說而心內利之俟至五六日竟無關通者李亦心怒乃命文武大員封其廠而逐其人先是

孫君芝桂爲順甯令以運銅北上差回補山方伯謂順甯苦將移之彌勒孫微聞廠已旺願回順甯回未幾而廠遭封又無幾而以越獄呈議時歲之己亥明年而潛山熊生至乃合江楚川三省之走廠者謀於白石生改名湧金山聞於臺請開諸公多爲熊生事垂就而曹力阻之且狀熊生自廠起遠至鎮遠五千里間郵亭街市無不粘貼以絕廠民之從熊生臺議以待新順甯至卽行熊生亦能已要新守兄弟賓客無不樂從而曹更奇出直迎新守居其館朝夕密言新守行其兄弟賓客爭喜以爲卽開而廠客迎

熊生且三日程共推以爲三省都管事蓋厥例以管事爲極尊也而新守密稟如曹指雖其兄弟賓客亦不知符下惟有長嘆而厥復封辛丑曹乃兼管順甯而厥乃開錮磔之礦已盡變時熊生已往樂馬同好招之至順甯留數月仍東回而曹亦厭厭失志不似從前之興高采烈旋卒於順甯熊生亦旅殂於蒙自楊公署楊乃熊親也能名錫袞祖會珍鎮江守父世來朝城令嗚呼熊生竟止於茲亦可惜也已孫君字郊林與予爲同年嘗問以前事真否孫曰何嘗不真今雖封之然攻採者尙多不能禁彼意不過藉

此以洩忿耳然曹之沮留以自爲旋得順甯許臺年例以五萬而厥再開開遂變故老言凡厥正盛時不可封封則礦盡走故厥中禁封字書封爲豐

悉宜厥在耿馬土司地曰大黑山亦銀厥也乾隆五十年全保以雲南府丁憂回京已而來守曲靖有常德者乘其未至以順甯易曲靖竟奪之全保至不如伊何乃往順甯而悉宜厥忽大旺適緬酋有內附意藉其力招致之永昌拔貢陳令憲客於耿馬土司罕氏罕甚信任以使於緬入其境道頗平其畜無雞豚鷺鴨多狗見漢服者爭吠逐嘍

人更緬服乃已食亦米飯非糯也但軟白可口不嗜葷腥
水多魚不甚取食大費或擊一牛俵分之然不恒擊也有
官職者得服絲帛庶人盡布服不敢衣絲紬王甚辨口折
之以理亦卽服楊公重英羈彼二十年住於塔下卧一石
版氈盡敝緬不禮之日賣草方自給緬和尚甚敬楊公稱
爲大老爺供至卽呼其徒請楊大老爺食或他出必留供
以待之其供蓋國人所輪流以具者終不乏也時省符令
貢使由順甯入他符令貢使由永昌入王要定于一因返
一之再往而始定始以百人往不損一人後往半之而沒

者十餘不見有瘴氣而實受瘴也夫以順甯易曲靖乃冥
冥中使全守成此大功若使常德來厥未必出卽出而彼
顧其私不肯爲盛事大功何由成全守成大功效究不以
之居且又奪其順甯厥亦漸就衰全守資於厥因罕土司
以招緬甸緬甸來臺昵常德深終不悅全保且怒其招緬
人惟怯不敢奏緬使留耿馬彌年不得已始以聞榮寵及
於諸人而全保不得與卽罕土司之所以招徠與陳令憲
之再使緬亦皆沒之不復見也惜哉居久之始移全保於
普洱又移之元江不得意以瘴沒嗚呼數十年前傾天下

之力不能奈一小彘何至是遠人之來由於一守臣能招致此其大功爲何如而抑之摧之俾其以瘴死亦獨何心也楊公羈蠻節同蘇武負天下之疑謗令子被禁且二十年幸而入關行次耿馬俄以不起聞耿馬人傳頗有異論此二事言之能不動天地而泣鬼神哉嗟乎募隆敗而召邊禍悉宜旺而招遠人故詳論之以厥之所關繫於邊方至重也

募隆之出由吳尙賢家貧走厥抵徼外之葫蘆國其酋長大山王蜂鏡信任之與開茂隆厥大贏銀出不貲過於內地之樂馬厥二厥東西競爽故滇富盛民樂而官康尙賢志漸張思假貢象得襲守大吏謾之隨貢行貢旣進不能如所望怏怏回恐其回厥生變拘而餓死之厥遂散蓋蠻方之所憚者募隆吳尙賢桂家宮裏燕後又誘殺宮裏燕滇人所謂自去防邊兩虎而邊蠻生矣論者以銀幣之濟中國者首則滇之各厥次則粵海花銀滇昔盛時外有募隆內有樂馬歲出銀不貲自尙賢死募隆遂爲夷人所據而樂馬亦漸衰於是銀貴錢賤官民坐受其累况啟釁召兵如往者征緬之役騷動幾遍天下數十年來元氣尙未

充由官之措置乖方甚哉守邊者宜用有學問通達治體之重臣也故著明銀廠之開可以實內地廠民之保廠足以防邊始嘗爲論以告於上官固無見省者乃書於此以爲後之守邊者取法焉

募迺廠孟連土司之東土司刁氏世擅其地雍正八年刁派夷獻此廠願歲輸廠課銀六百兩總督鄂爾泰以聞上嘉之爲減其半甯臺諸廠介黑惠瀾滄之間者出銅自湧金山而至於悉宜募隆募迺在諸土司地滾弄江內者皆出銀古者重銅以充鼓鑄爲錢幣而銀幣不行數百年

來錢銀并行而銀幣尤盛凡額征輸納餉運俸廉歲百千萬皆以銀故銀出之豐嗇尤爲民生之利病說者必欲錮銀廠使廠民專趨於採銅銅亦勉強支撐而銀日見其缺以不度於時勢而各欲濟其私也自古以來未有不重廠務也其山有廠者必謹封而祭之申其厲禁感召山靈而寶藏興黃帝於山之見榮者有然距封十里而爲一壇乘者下行者起犯令者死不赦修教十年葛盧雍狐之山皆發而出水金從之受而制之其嚴如此今任廠民之自爲官不爲修其祀宜乎山之見水不能常也夏水商旱禹發

歷山之金湯發莊山之金作幣以濟民文武之王天下取
牛氏邊山之玉汝漢右滄之金赤水未光之珠皆距周七
八千里深遠而至難珠玉爲上幣黃金爲中幣刀布爲下
幣刀布卽今錢也而已居金之下矣銀白金也白金之幣
行之久執錮銀開銅之偏論原非所通主者亦爲附和心
不能白能不動山靈之訶乎昔貢禹奏言古者不以金錢
爲幣專意於農故一夫不耕必有受其饑者今漢家鑄錢
及諸鐵官皆置吏卒徒攻山取銅鐵一歲攻十萬人已上
中農食七人是七十萬人常受其饑也鑿地數百丈銷陰

氣之精地藏空虛不能含氣出雲斬伐林木亡有時禁水
旱之灾未必不繇此也自五銖錢起已來七十餘年民坐
盜鑄錢被刑者衆富人積錢滿室猶亡厭足民心搖動商
賈求利東西南北各用智巧好衣美食歲有十二之利而
不出租稅農夫父子暴露中野不避寒暑梓草杷土手足
胼胝已奉穀租又出豪稅鄉部私求不可勝供故民棄本
逐末耕者不能半貧民雖賜之田猶賤賣日賈窮則起爲
盜賊何者末利深而惑於錢也是呂奸邪不可禁其原皆
起於錢也疾其末者絕其本宜罷採珠玉金銀鑄錢之官

亡復曰爲幣市井勿得販賣除其租銖之律租稅祿賜皆
曰布帛及穀使百姓壹歸於農復古道便竊案貢公之奏
謂攻採消陰氣之精不能含雲出雨是時銅鐵之官徧於
各郡國今遠在滇黔未能以一方雲雨及天下其爲害猶
屬渺茫至謂一歲受饑且七十萬夫此根本切實語今合
順甯諸廠其人之多也不可算數况總全滇諸廠而計之
則其數其止七十萬哉而以食七人爲算則受饑且七百
萬人矣且錢以準貨不過此數以流轉無甚大耗今滇南
供京局及各省局以斤計銅歲千二百萬錢出之多宜公

私山積而今富家未聞有積錢滿室者錢質雖大積數年
自碎故無積之者又不可銷銷卽不可爲器物故無消之
者積與銷俱無而錢不見盈則歸於何處耶嘗以此義語
於通人俱不能解也

亡復目為幣市井勿得販賣除其租銖之律租稅祿賜皆

漢書

食貨志

卷之九

三

三

三

三

三

三

三



Faint, illegible text visible through the paper from the reverse side of the page.

